

**KOLIDI EBEKU' ALEVE LINGE  
 IZESU' ZUHO MINANI' NETI  
 LUHUVO NITE' PAULO'  
 GIZE-NGIMINE' NABA 2  
 Izesu' Evenele Zuhu Kolidi  
 Ebeku' Minani' Neti Luhuvo  
 Paulo' Gize-ngidine' Naba Tu  
 Ne'mi Gomu' Gataa' Gamazi**

Mene luhuvo nite' nene aposolo Paulo' gizine'. A'mine Paulo' monovo'vemu' nene Aposolo' bukuu' nene gatelesane. Ido' Izesu' Kilisito' evenele zuho Loma ebeku' minani' neti luhuvo nite' Paulo' gize-ngidingumu' gomu' gataa' gamazi gizuningukisi nene ei' Paulo' monovo'vemu' nene ma gatelesane. Mene luhuvo nite' nene Kolidi ebeku' Izesu' evenele zuho minani' nene gizo hulo-ngidine'. Paulo' Izesu' evenele zuho Kolidi ebeku' minani' neti luhuvo nite' gize-ngidine' naba vanumu' gomu' gataa' gamazi gizuningu' nene a'mine Kolidi ebekumu' gato gelelesane.

Ido' Izesu' evenele zuho Kolidi ebeku' minavela nene geni minavo nemu' Paulo' aza naba vanu luhuvo nene a'mine genimu' gizine'. Geni mala nene mo di lisihe' ikeni'za Kolidi ebekuti' evene' malite nene laza aposolo' none li Paulo' nene aposolo' gihile nomive lani'. Ido' Paulo' ogo molo minine' initekisi ido' gamazi line' nesi nene divi' ledivika li-di Kolidi ebeku' Izesu' evenele minani' nete Paulo'ni nene ningi huli-mikilizave

li amuzo milani'.

Paulo' aza Kolidi luhuvo nite' naba vanu nene gizo hulosa naba tu luhuvo nite' nene olihe gizamivo ne gamenelo' nene nanite' soto' ihe nemu' nene ma ningo gele lamine' amune. Kolidi luhuvo nite' naba tuu' nene Paulo' aza ti' lo line': Kolidi ebeku' vo ninge-ngidingu' nene mulumo geni ezelasido' Izesu' evenele zuho a'mida minadasi soto' ogavo alinge' Paulo' aza amuzo malehe luhuvo nite' gize-ngidine'. Ne'mine ogo alinge' nene amuzo malehe luhuvo nite' gize-ngiduhe lo gala gelo geni biline'. Kolidi aleve ingine gosele' goloso ngebelavo eikumu' ngize-bolo' molalihe lo gala giline'. Ezesi maka' gono daa' asive Tito'ni nene Kolidila eletine'. Ei' nene a'mine luhuvo nite' nene do vo noloseive. Ido' aza tine' molo aline' nene Makedonia polovini-siuko ogosa neloti' ledovo guvo nosolo' vo Toloasi taunila voloseive. Ne'mine iline' nenako nemu' nene Paulo' aza Eheso misubo hulo Toloasi ebeta vine'. Ne'mine ine'za Tito' aza olihe a'mida vo hetelamine' neivo Paulo' aza Kolidi aleve luhuvo nite' ve di gatikevo neloti' nanite' soto' ihe nemu' Tito' ogo lo-emelingumu' gizebo ogo miningu' nene mono' lo-ngemaa' gono'veu' ngelo lamine' minamiline' ogavo a'mine Toloasi ebe' nesi nene hulo guvo nosolo' ledovo Makedonia polovinisila vo minine'. Tito' aza a'mida votene' odo gei' luhuvo niteka ne'mo Kolidi aleve ingine mulu'ningu' goloso gilani'za evene' muki' nene goloso niteto' mehe'ine imi gaza ne'mine ilo lo lo-ngedanido' nene gili di e'meti minave lo lo-imine'. Nemu' Paulo' aza a'minemu' olize izine' nene lo-ngemelesa Kolidi aleveti luhuvo nite' naba tuu' ve laa' noune' mene gize-ngidine'.

Ido' aza ogo ninge-lengedelesuve lo lo huko-ngidido' olihe do gihile izamine' monovo nemukisi ido' engita alosa neingumukisi lo-ngemelesamu' gizine'. Ido' Tito' nene evene' gohi masi gomu' vilisave lo nemukisi lo-ngimine'. Vilizani' nene Zelusalemi ebeta goho' gahali' minani' nene hize ele' i-ngidilisamu' huli-ngidilisa moni di'mi monani' gono nene di osu' lilisamu' vilisave lo lo-ngimine'. Ido' a'mine ve ngimiseline' nene Paulo' aza Kolidila viline' gameneu' inite' muki' nene mo di va'va' i minado' vo hetelelesamu' nene ngimiseluve line'.

Ido' Izesu' evenele Kolidi ebeku' minani' nene soza aposololite go'ine izi ngele'mizi gopo ike-lizave lo ido' engi' lani' gamazilo' do ti'no longemo ido' ei' nene aposolo gihile nouve lo ngelebizelesamu' ido' eikumu' lave nene sozalo' aposolo ne nizave lo ngelebizelesamu' luhuvo nite' gizine'. Alinge' gehepeve nene lu'ine di velepe' izamave nene ga'ine do ti' lo line': Lu'ine olihe di velepe' izamave ingine aza a'mida olihe vo hetelamivo lu'ine ma di velepe' izamilizani' nene aposolo amuzo'vetunu' gono do lihime ngemelesuve lo line'.

Ne'mine lo mese' aseka lo-ngedo no'noho' gamazitunu' luhuvo nite' gize osu' line' ve.

*Paulo' Aza Izesu' Evenele No'noho' Ize-ngedo Lo-ngimine' Gamazi*

<sup>1</sup>Izesu' Kilisito' aposolo mineline lo O'moso'mo ei' lulolo' nele'mize molave Paulo' naza leze zuho Timoteokisi maka' mino O'moso'mi evenele

zuhu Kolidi ebeku' mulise milaa' nave lengik-  
isi ido' Akaia misubo linge mukiku' O'moso'mi  
evenele mini'mi monani' lengikisi nene luhuvo  
nite' mene nogize-lingiduze. Ningilo. <sup>2</sup> Ido'  
meteho O'moso ido' Guvesi ve Izesu' Kilisito'  
engitati' nasahili' ido' hongu lo lamino minaa'  
monovo nene lengita mine do vo minivoo.

*O'moso'mo Do Lu' Izaa' Ine' Monovo Lo  
Soto' Ogo A'minemu' Paulo' O'moso Opo'ni Line'  
Gamazi*

<sup>3</sup> Guvetesi ve Izesu' Kilisito' ei' O'moso've  
mino ei' meleho minive nene opo'ni lolone.  
Aza nene mulumote gelaa' monovoli'mi meleho  
mino hize ele' oga' monovo muki' do soto' o-  
ledaa' neine' O'moso nene neive. <sup>4</sup> O'moso naza  
hize ele' okuvo ingine a'mine'mine igi evene'  
ma ne'mine mana'mine geni gihilizani' nene  
hize ele' i-ngidilizado' lisihe' i minilizangumu'  
ve lo aza nene genite vaiku' hize ele' o-ledaa'  
neive. <sup>5</sup> Ido' ne'mine noluvoni' nene nemu'  
noluve. Laza nene Kilisito' mulumo gilidi'mine  
ogo mulumo vauve elo gelaa' nune'za a'mingu'  
nene O'moso'mo Kilisito'nimu' ve lo hize ele'  
nesi vauve elo o-ledaa' neive. <sup>6</sup> Laza mu-  
lumo gono nodune' nene O'moso'mo lengi' hize  
ele' o-lengedo do lungu' izelingumu' ve losa  
nene nodune. Ido' O'moso'mo leli' hize ele'  
o-lede neine' ne'mo nene lengi' hize ele' o-  
lengedelingumu' ve lo hize ele' o-lede neive.  
Laza mulumo gono nodunidi'mine igi lingi-  
nesi nene mulumo gono di ha gihi di dizi  
minilizani' ne'mo nene O'moso'mo a'mine'mine  
ogo hize ele' o-lengedeleseive. <sup>7</sup> Ido' leze mu-  
lumo gono dunidi'mine igi linginesi nene nidaze.

Nemu' nene O'moso'mo leli' hize ele' o-ledaa' neidi'mine ogo lengikisi nene a'mine'mine ogo hize ele' o-lengedeleseive lo gelosa lengikumumu' nene monoku' ele'vole' igi minilisave lo gele none' nene mo gele ele'vole' o none.

<sup>8</sup> Neze zuhokizo, Asia misubou' geni initeli'mi lulou' minune' nemu' nene lo-lengemamuvo lingine gilami minilizani' nene edamoloseive lo gelosa mene nolo-lingimuve. Laza nene a'mine geni leli' okodela soto' ine' nene atoli'mine geni mo ngelo gehamolonido' o minine' geni soto' o-ledavo ne'mo leli' nene gohi minevo' alevu' amolobe lo gate muki' goloso gelo golise gilune.

<sup>9</sup> Ee, luteu' neve nene mo helaato' lele'mize milikeni' neive losa gele minune. Ne'mine inite' soto' o-lidine' nene laza lelito' gele medelo mino minamo asi hilanguti' do ote-ngedaa' ive O'mosolo' nene lehete o mineloningumu' nene soto' o-lidine' ve. <sup>10-11</sup> Ido' monovo goloso gehepeve ato ato' i-lidilisa ani' ne'mo nene hilunidine'za O'moso ne'mo nene mo do lu' ize'mo vo minine' ve. Ido' aza gohi do lu' izelido' o neive. Ee, linginesi nene lelikumu' O'mosola li hize ele' i-lidi nizavo aza nene gohi do lu' izeleseive losa eito' gele mu'musi' ogo none. Ne'mine ogosa ezela evene' mukilite lelikumu' lilizani' nene gelosa mangi o-ledo lukuvo lemeline' nene evene' muki' ingine O'mosola nene leli' ne'mine o-ledeline' nemu' nene opo'ni lilisave.

*Paulo' Engita Volove Loko Vamine' Monovo Longimine' Gamazi*

<sup>12</sup> Ido' ne'mine noluvoni' nene nemu' noluve: Leli' luteu' nene ti' lo gele ele'vole' ogo none:

Me misubou' aleveti vovo'ningu' ogo molo une' nene me misubou' aleve gilavo otohato monovo ve laa' nani' monovolo' nene e'metamo asi O'moso'mi nasahili've ne'mo hize ele' o-ledo neivo monovote nene do zovo' zava' izo soza nite' amo O'moso'mo gilivo lisihe' iline' initekovo' nene ogo molo minune' ve. Ido' lengita nene a'mine monovolo' nene e'mete gehepeve ogo ogo molo minune' ve. Ido' luteu' nene ne'mine lo gele ele'vole' ogo minaa' nune' nenako leli' monovotemu' nene lolize iza' nune. <sup>13-14</sup> Ido' monovote nene zovo' zava' izo soza saza inite' osa'mune lo luvoni' gamazi mene mo lamine-tokovo' noluvoni' nene luhuvo nite' meneloti' nene ningi gililisave. Naza gamazi gizaa' novoni' nene suno' gamazi gizamo asi soto' ogo minine' gamazi lingine ha gati gili guni ilizado' o minine' gamazivo' nene gizaa' nouve. Leli' monovote lingela nene lingine mo gili guni i nizave. Ido' monovote lingela lingine gili guni ani' ne'mino nene lelikumu' gili guni igi osu' lisa lelikumu' ti' li gililizaho lo gele minaa' nune: Ado' Guvetesi ve Izesu' Kilisito' aline' gamene nabala nene Paulole lelikumu' ngolize iza' naani' ne'mine ogo laza Paulonginemu' lolize izelonido' o none li gililizaho lo gele minaa' nune.

<sup>15</sup> Ido' lingine nenikumu' nene mo lamine' gililisave lo naza gele mu'musi' o mino gomu' nene naza gamene sita' lengita vokuvo lingine gamene sita' muludingu' lamine' gililizave lo gelo <sup>16</sup> Makedonia misubou' volodo' nene lengitasi voosa alodokisi nene gohi lengita ogo ninge-lengedekuvosa nene lingine Zudaia misubou' voloni' aka'ne vili-nidisa nimiselilizave

lo giluvoni' ve. <sup>17</sup> Ne'mine lo gelosa lengita amuvoni' nene naza gamazi do senisi senisi ogo laa' uve nouvodi'mo nehe. Naza oloni' initekumu' ga'ne gelo do lisihe' oga' nouvongu' nene me misubou' aleve vai' iga' adi'mine ogo oo, ne'mine ha olodo' nouve nolo a'midokisi o've, mo amolosuve lo laa' nouhe. O'ove, mo ne'mine osa'muve. <sup>18</sup> O'moso eikumu' nene evene' muki' gele mu'musi' olonido' lisihe' o neine' nenako nemu' nene lingine lelikumu' nene gili mu'musi' ilizado' o neive. Laza lo-lengemaa' nune' gamazi nene senisimi senisimi osa'mune. Oo laa' nouningu' o'ove haleko minaa' neine' nel'mino haleko neivosa nene ma losa'mune. <sup>19</sup> Naza lamineto' noluve. Laza Siluvanolesi Timoteolesi lo soto' o-lingimunive O'moso'mi gipele Izesu' Kilisito' ei' nene oo lingu' o'ove nene a'mingu' minamivo gamazi laa' ive nene neive. Aza oo line' inite' nene mo gihile izaakovo' oga' neive. <sup>20</sup> Ee, aza nene O'moso'mo salani gamazi lo hukaa' neido' nene oo lo do gihilevo' iza' ive nene neive. Nemu' nene a'mine O'moso'mi gamazi gelosa O'moso opo'ni nolo lamine' ele'vole' gamazi ve laa' nune' nene ei' Izesu' Kilisito'nimu' ve losa nene lamine' ve laa' nune. <sup>21</sup> Ido' Kilisitoda gi'mize gili' lo mineloningumu' lezesi lengikisi hize ele' oga' ive nene O'moso ei' nene neive. Aza nene ei' gonolo' lele'mize molani' ve. <sup>22</sup> Ido' lele'mize nomolo ei' ve lo noso molo-ledo salani molo-lidine' inite' muki' nene damolosune li gilike-lizave lo a'minguti' ma gana' dalonido' o minine' inite' ei' Sikalahu've nene luteu' lehize-ledavo neive.

<sup>23</sup> Naza Kolidi ebetida vamuvoni' nene naza ma voloni' nene geni gono gehe-lengedekuvo okodido' gilikelizave losa nene do lungu' izosa vamuve. Nene mo lamineto' noluve. Soza nololoni' nene lu'neu' ninge osu' lo neive O'moso ne'mo nene lo soto' ilive losa ezela nene noluve. <sup>24</sup> Lingine gamazi gihile gili ele'vole' igi monoku' mini gili' li nizani' nenako nemu' gizebo amuzo molo o-lengedo mino ne'mine mana'minemu' gili ele'vole' ilizave lolosa gelamune'za haza lingine muludingu' lamine' gili minilizangumu' lengele'mize lamine' olosa nene lengikisi maka' gono nodune.

## 2

<sup>1</sup> Ee, naza nene mo ga'ne gele nge lo mino lengita gohi ma voloni' nene geni initeli'mi lulou' gohi lengele'mize molalove lo na'nise'ne o'ove losa nene nizada vamuve. <sup>2</sup> Ido' neni' nolize izo minelodo' nele'mizi milalizave nene lengi' nizani' nenako naza nene lengi' nizada vo hetelo geni gono ma gehe-lingiduvodiniko zamotelite nene naza nolize izo minelodo' nele'mize miladine. <sup>3</sup> Ma minamadinako nemu' nene naza nolize izo minelodo' nele'mizi milalizave lengikumu' nene mulumo geni gehalove lo gelo ido' naza nolize ma izeloni' initekumu' nene linginesi a'minemu' longolize izilizave losa lengikumu' nene gele mu'musi' o mino a'mine luhuvo gize-lingiduvoni' gamazi nene gizuvoni' ve. <sup>4</sup> Ido' a'mine amuzo malehe gamazi lo luhuvo nite' gize-lingiduvoni' nene lu'ne ga'neu' nene lengikumu' geni nibilivo mino mulu'ne hukavo ve'ne novoza naba do'moze'



moze' neivo nogizuvoni' nene lingine lutingu'  
mulumo gililizave losa nevoba asi neni' lu'ne  
naba goloso lengi' lengeme nouvoni' nene ningi  
gililizangumu' ve losa nene gizuve.

*Goloso Nite' Dave Ma Nene Mo Lihime Imikeni'  
Nenako Idise A'mine Lihime've Nene Huli-disa Lu-  
tine Ha Imi Nizani' Nene Elebizilo Lo Paulo' Line'  
Gamazi*

<sup>5</sup> A'mine goloso nite' do geni do soto' ive  
ne'mo nene nenikovo' geni ma gehe-nedamive.  
Asi lengi' mukita nesi nene geni lingela gehe-  
lengedave. Ido' geni lingela gehe-lengedave noluvoni'  
nene do geni ogo lolosa gelamuve. <sup>6</sup> Ne  
neiha a'mine goloso nite' dosa lihime dave nene  
evene' mukilite lihime imi lihime've apasi-dani'  
nene modave. <sup>7</sup> A'mine ve nene gopo gala gelo  
geni naba gehu mineline' ne'mo do ongo-dalize.  
A'mine lihime've gohi di minami huli-disa eze  
lulou' lamine' geleline' inite' i-di ele'mize lamine'  
ilo. <sup>8</sup> Ee, geni ne'mo nene do ongo-dalize. Lengita  
mulumo gani noluze. Eikumu' goloso gilami lutine  
ha imi nizani' nene ningo gelelize. Elebizilo.  
<sup>9</sup> Ido' a'mine luhuvo nite' gize-lingiduvoni' nene  
naza ne'mine mana'mine initekumu' luvoni'  
mamu' nene lingine gili daakovo' i nizahe lo  
a'minemu' monovotine do ningelove losa nene  
gizuve. <sup>10</sup> Lingine evene' mali'mi lihime've huli-  
dani' noline' nene nazasi hulo-delodo' o nouve.  
Ee, a'mine ve nene neni' lihime molo-nede noline'  
nene a'mine lihime nene mo hulo-dekuvoni'  
ma neive. Ido' lihime've huluvoni' nene Kil-  
isito' velelo' lengikumu' ve losa huluve. <sup>11</sup> Nene  
nanitekumu' ve. Satani aza lele'mize gopo olosa  
gelaa' neine' nene mo gele nounako nemu' nene

gote izo livile' ogalive losa a'mine ve'mi lihime've nene hulo-duvoni' ve.

*Paulo' Toloasi Ebeku' Vo Gono Lamine' Nodangu' Nene Tito' Minamingumu' Lihitehe' Gala Gelo Hulo Makedonia Misubola Vavo O'moso'mo Hize Ele' O-dingumu' Line' Gamazi*

<sup>12</sup> Naza Kilisito' gamazi lamine' nene lo-ngemelesa Toloasi ebeta vo noheteluvo Guvelesi ve'mi gono do-delodo' aka nene ma soto' o-nidine'za <sup>13</sup> neze zuho Tito' nene a'mida minamivo ma votene' o-damo ezemu' nene ga'ne muki' gelo minuvoni' nenako ne'mo nene mine guno amoloni' ogavo a'midoti' nene mo minilo lo hulo-ngedo Makedonia misubouko ezemu' vise' olosa yuvoni' ve.

<sup>14</sup> Ne'mine uvoni'za O'moso'mo gamene gamene hize ele' o-ledaa' neingumu' nene opo'ni noluve. Aza nene Kilisito' biluva've ngivile' ogo osu' lingumu' lolize izo unuvo huhu lo minine' guvele nene numudo' namado' lo soto' olonido' nene lele'mize molavo monaa' nouné. <sup>15</sup> Ee, Kilisito' gamazi lo-ngeme'mo monaa' nounive laza unuvo ne'mine nouné. Ado' lovou' gomú' molaa' ive'mo biluva've ngivile' ogo a'minemu' olize izo vaa' neida nene unuvo huhu lo minaa' ine' sokile nene gizikevo hutile' ogavo eze zuho gilavo lanite' ogavosa ido' biluva've linge a'mingu' ngele'mizi monave nene gilisa leli' libililisa nave li gilavo a'mine unuvo nene goloso lolo' oga' neine' ne'mine nene none. O'moso'mo gelavo laza Kilisitodati' unuvo lamine' ezela dizine' ne'mine nene none. A'mine unuvo nene lukuvo nalizavetingukisi ido' vi tolovo ilizavetingukisi nene hutile' oga' neive.

16 Ido' a'mine unuvo nene vi tolovo ilizavetida ogosa hililizani' monovo'ine do soto' o-ngedosa ngebele helaa' unuvo gehepeve lolo' oga' neive. Ido' lukuvo nalizavetida ogosa minevo' minevo' ilizani' monovo'ine do soto' o-ngedosa do ve'ine gize-ngedaa' ine' unuvo lolo' oga' neive. Ne'mine oga' neinako a'mine meuko noluvoni' gonolo' nene zamote dalizado' lisihe' i nizave. <sup>17</sup> Evene' hamolitesi lisihe' mo amune'za laza nene evene' linge muki' go'ine izi moni polopeti lili' ilisa O'moso'mi gamazi di monaa' nadi'mine amo O'moso'mo do ote-ledavo asi've O'moso ninge neivosa nene Kilisitoda mine molo mino do voziu' vomiu' amo gono lisihe' lamine' dosa nene O'moso'mi gamazi laa' nounako a'mine gono nene leli' ne ha dalonido' o neive.

### 3

*Paulo' Ei' Monovo Lo Soto' Ogo O'moso'mo  
Lo Huko-lidine' Gamazi Gosoho' Ne'mi Gonou'  
Ve Nouve Losa A'mine Lo Huko-lidine' Gamazi  
Gosoho' Ne'mo Litehe Nene Ivile' Ivo Lamine'  
Goloso Neive Line' Gamazi*

<sup>1</sup> Ne'mine noluvoni' nene leli' monovote nene lamine' ve losa a'mine gamazi ma nene gohi api' ogo nolo-limive lisa nigilahe. Ido' mono' laa' ave linge ma nete evene' malite engi' monovo'inemu' li soto' igi gizani' gamazi nene ma disa a'mine vilizada minaa' nani' aleve nene ngimaa' nave. Lingine gilavo leli' nene a'mine'mine ogo evene' malite leli' monovotemu' li soto' igi gizani' gamazi ma dosa lengemelonido' o neihe. Ido' a'ne'mine luhuvo nene evene' ma ngemel-oningumu' nene lingine ma gizi limilizado' o

neihe. <sup>2</sup> O'ove. Leli' monovote lo soto' iline' luhuvo nite' ne'mine nene mo lengi' nene nizave. Ido' a'mine leli' monovote lo soto' iline' luhuvo nite' gizahe' nene leli' luteu' do nonivo evene' muki' nete nene a'minemu' ningisa gilaa' nave. <sup>3</sup> Leli' mono' gono nodune' ne'mi gihile've lengi' nene Kilisitodati' luhuvo nite' ne'minisa nizani' nene mo soto' gehepeve o neive. A'mine luhuvo nite' nene ingi noso ne'minedunu' gizani' nomive. Ido' gehenilo' luhuvo mili gizani' ne'minesi nene nomive. Asi minevo' minevo' O'moso ne'mi Sikalahu' nedunu' nene evene' lengi' lutingu' nene luhuvo ne'minosa gize neive.

<sup>4</sup> Ne'mine nolune' nene Kilisito' gono dani' ne'mo nene O'mosolo' gele mu'musi' o none' nenako ne'mine gamazi lamine' nene laa' noune.

<sup>5</sup> Ido' ne'mine laa' noune' nene gihile ne'mine do soto' olonido' nene laza mo lisihe' o none losa nevoba ne'mine amuzo nene lelita ma nomive. Asi O'moso ei' nene amuzo lemo a'mine gono dalonido' nene do lisihe' o-ledaa' neive. <sup>6</sup> Aza nene lo huko-lidine' gamazi gosoho' ne'mi gonou' ve minelonido' nene do lisihe' o-lede neive. A'mine gono nene gizikani' neine' lou' gamazi malo' nevoba asi O'moso'mi Sikalahuto' nene neive. Nene nanitekumu' ve. A'mine gizikani' neine' lou' gamazilo' nene ngelo e'metamune' ne'mo nene lute helavo a'mine louli'mo lebele helaa' neine' giline'za O'moso'mi Sikalahu' ne'mo nene minevo' minevo' lemeni dameni lemo do upuho' o-ledaa' neive.

<sup>7</sup> Ee, ido' a'mine gehedo' gizikani' neine' lou' gamazi'mi gonoloti' nene helaa' noune'za a'mine lou' gana' soto' ine' nene mo vode gade viline'

inite' amuzo'vesi labana'vesi nene soto' ine' ma neive. Ido' a'mine amuzo labana've nene vo Mose' golo veleloti' nene silingenge'ni hulo minine' nene gopo oka' oka' o'mo vo minine'za a'minesi nene Isilaele' aleve ningavo ve'ine lenge lenge lavo vonu' bililizado' lisihe' amani' ve.

<sup>8</sup> A'ne'mine inite' nene ne'mino minine' nenako O'moso'mi Sikalahuli'mo do soto' o neine' mono' gono ne'mo nene a'mine litehe mono' nene ivile' nabalo' goloso ivosa leli' vode gade goloso viline' monovo'vesi soto' oloseive. <sup>9</sup> Ee, gonito' ngele'mize molaa' ine' mono' litehe ne'mo nene inite' naba mino vode gade viline' monovo'vesi minine' nenako O'moso'mo evene' lisihe' ve lodedelido' lele'mize molaa' neine' mono' gono gosoho' ne'mo nene ivile' goloso ivosa inite' naba goloso mino vode gade atoli'mine goloso ogosa viline' monovo'vesi noloseive. <sup>10</sup> Ee, mono' gosoho' ne'mi monovo've vode gade vaa' neine' ne'mo nene ivile' ogo dizo minidi'mo nene mono' litehe labana'vesi mino vo'ine ga'ine vaa' neine' monovo've ma nene mo vo halekave. <sup>11</sup> Ee, a'mine mono' liteheli'mi labana've nene vo gopo oka' oka' o'mo vo osu' line'za a'mine nesi nene vo'ine ga'ine vaa' neine' inite' minine' nenako osu' lamo minevo' minevo' monovo've laminekisi minine' mono' gosoho' ne'mo nene ivile' ogo vode gade goloso viline' inite' mineleseive.

<sup>12</sup> Ido' a'mine noluvoni' monovomu' mene mo gele mu'musi' o none' nenako nemu' nene laza gamazi laa' noune' nene do hito gepe' gamazi ne'mingutikisi lamo asi mo gamazi lamine' so-tokovo' lovo' kiselevo' ogo laa' noune. <sup>13</sup> Laza nene Mose' ne'mine nene minamune. Aza

nene ei' veleloti' silingenge'ni hulo minine' vo gopo oka' oka' o'mo vo osu' nolivo Isilaele' aleve nene a'mido' gisili hizi ningi minikelizave losa velelo' nene lavolavo do hitine' ma neive. <sup>14</sup> Ne neiha Mose' golo velelo' lavolavo do hitine' ne'mino Isilaele' aleve nene O'moso'mo lo huko-ngidine' mono' litehe gatangu' gatangu' monovo've gilisa'mani' nenako nemu' nene idise engi' lu'ine ga'nido' nene ha hite neine' gele neivo lu'ine ga'nine nene ha ngi lo neive. A'mine lute gatelo' hite mineline' inite' nene mo Kilisitoda vo gi'mizekunivosavo' nene do hulo-ledeleseive. <sup>15</sup> Ee, idise mene gamenelokisi nene Mose' gizine' mono' gamazi evene' gati ngimaa' naani' gamenelo' gamenelo' nene Isilaele' aleveti lu'ine ga'ine nene initeli'mo ma hite neine' gele neivo minaa' nani'za <sup>16</sup> mono' godolou' Mose'nimu' ti' li gizi nizani' ma nene engitokisi ha gihile izelido' o neive: Ido' Guvelesi vela mine velepe' izine' gamenelo' gamenelo' nene velelo' hitine' inite' nene do hulaa' ine' ve. Ado' Guvelesi vela mini velepe' izilizani' gamenela nene a'mine lu'ine'mi velelo' hitine' nene do hulo-ngedeleseive. <sup>17</sup> Ido' Guvelesi ve ve noluvoni' nene Sikalahu'vemu' noluve. Ido' Guvelesi ve'mi Sikalahu' lelita minive nene inite' mali'mosi nalava ize-ledamivo apase-ledavo haza minaa' noune. <sup>18</sup> Ee, laza mukito' Mose' inite' velelo' hitosa minaa' ine' ne'mino minamo asi mukito' nene vete haza soto' o neivo mino gapogapoli'mo silingenge'ni gohi do tine' molo hulo mala oga' neine' ne'mino Guvelesi ve'mi monovo've vode vaa' neine' monovo've nene lelitati' hulo evene' mala oga' noune. A'mine

monovo've lamine' goloso lelita minine' nene vo naba o'mo voovo' neivo laza nene ei' Guvelesi ve'mi emeni damenilo' gehepeve lisihe' ogosa medelo minaa' noune. Ido' ne'mine noune' nene O'moso'mi Sikalahuli'mo nene oga' noune.

## 4

*Laza Nene Inite' Lamine' Minamo Ha Misubo Somo Ne'mine None'za A'mine Misubo Somo Ne'mi Lulou' Nene Inite' Lamine' Tamine' Gehepeve Minelido' O Neine' Ne'mino Leli' Luteu' nene Inite' Lamine' Tamine' Ado' Kilisitokisi Ei' Monovo Danava've Lamine' Masi Nene Neive Lo Paulo' Line' Gamazi*

<sup>1</sup> Ne'mino neine' nenako O'moso'mo asi've lulo lamine' lemosa a'mine mono' gono lamine' mene lemavo do do vo minaa' nouningu' nene gosele' ogo muludeu' goloso ogavo ma hulosa'mune.

<sup>2</sup> Laza nene monovo goloso suno' daa' naani' ne'minemu' nene mo amolosune lo mo mehede emekune. Laza evene' ma nene go'ine izo O'moso'mi gamazi lamineli'mo lido' lamo do ato' ogo lo-ngemesa'mune. Asi evene' muki' leli' monovote nene ize' mili ningi hehe lilizangumu' ve lo O'moso'mi velelo' mino gamazi gihile laminekovo' nene lo soto' ogo ngelebizaa' noune.

<sup>3</sup> Ido' a'mine O'moso'mi gamazi lamine' lo soto' none' nene ma hito noline' nene mo vi tolovo ilizado' mini mili nizavelavo' nene hitosa mineleseive. <sup>4</sup> A'mine me misubou' aleve vi tolovo ilizave nene O'moso gihileloti' do eita medele- ngedavo gelekele' i-di nizave Satani ne'mo nene O'moso gele vive gehepeve Kilisito'nimu' guvele'vesi minine' gamazi lamine' ne'mo nene hize labana' ele-ngedavo labana've ningikelizave

losa a'mine O'mosomu' gili hulaa' aveti lu'ine'mi vele nene do like-ngidine' ve. <sup>5</sup> Ido' Izesu'nimu' gamazi ve luvoni' nene nemu' luve. Laza leli' nene le'metilizave losa ne'mine gamazi nene lo-lengemaa' nounivoba asi Izesu' Kilisito' nene Guvelesi ve ne neize. Ei' nene e'metilo losa nene lo-lengemaa' nounge. Ido' la'lisetemu' nene laza Izesu'nimu' gelosa lengito' gelekele' izipe ne'mine nene none losa lo-lengemaa' nounge. <sup>6</sup> Ne'mine noluvoni' nene nemu' noluve. O'moso gozopo' aka'mila liti'muso izo miningu' labana' soto' ilive live ne'mo nene O'moso neni' nemi dameni nene Izesu' Kilisito' veleloti' soto' neivosa a'midoti' nene ningi gililizangumu' ve losa luteu' nene hize labana' ele-lidine' ma neive.

<sup>7</sup> Ne neiha a'mine gamazi lamine' tamine' luteu' do nonive laza nene haza nite' heneni milaa' ani' somo misubodunu' lili' ani' ne'mine nene none. Ido' somo ne'mino haza nite' none' nene lelito' minine' amuzo atoli'mine goloso neine' neve nene lelitati' minamine'za asi O'mosolati' neine' nene soto' o minelive losa nene somo ne'mino haza nite' nene none. <sup>8</sup> Laza nene geni ato ato' gehaa' nounge'za ne'mo nene aka vamaato' ma lele'mize molosa'mive. Ido' geni inite' lelita minaa' neingumu' nene gate muki' gelaa' nounge'za a'mine ne'mo lute gate do gopo gehepeve ogo ma hize tile-ledesa'mive. <sup>9</sup> Ido' libililisasi nene vise' i-lidaa' nani'za O'moso ne'mo ma hulo-ledesa'mive. Ido' libilikevosasi nene lemo onгаа' nouba goloso gehepeve nene ma dosa'mune. <sup>10</sup> Neve nene laza mo Izesu' helaato' mine molo mino monaa' ine' ma'minosa nene nomonune. Ne'mine oga' nounge' nene lelitoti' nene Izesu' minevo' alevo've neine' ma nene



evene' muki' ningilizave losa nene ne'mine oga' nounge. <sup>11</sup> Ee, laza nene vetesi ha nounge'za Izesu'ni do minuningumu' nene gamene gamene helaa' akalokovo' lele'mizi milaa' navo minaa' nounge. Ne'mine oga' nounge' nene a'mine helaa' neine' okodeloti' mene Izesu' minevo' alevo've neine' nene soto' ogavo ningilizangumu' ve losa nene ne'mine oga' nounge. <sup>12</sup> Ne'mino neinako helaa' ne'mo nene lelita gono nodani'za ne'mine idi'mo minevo' minevo' oga' monovo ne'mo nene lengiku' gono nodave.

<sup>13</sup> Ido' ve mali'mo gamazi ma line' mono' godolou' minine' ne'mo nene lelitokisi vo do neive. A'mine gamazi nene ti' lo lo neive: Naza gele ele'vole' ogo nouvoni' nenako nemu' nene naza lo soto' nouve.

Lazasi nene a'mine'mine ogo Izesu'nimu' gele ele'vole' o minosa nene lo soto' oga' nounge.

<sup>14</sup> Ne'mine oga' nounge' nene a'mine Guvesesi ve Izesu'ni hilinguti' do ote-dive ne'mo nene Izesulesi maka' do ote-ledo lengikisi nene do ei' velelo' o-ledeleseive lo gele minosa nene ne'mine oga' nounge. <sup>15</sup> Ido' laza ne'mino mulumo alumo geni inite' gehu none' nene ha lengi' lamine' ilizangumu' ve losa nene ne'mine ogo none. Ido' ne'mine ogo none' nene O'moso'mi nasahili' ne'mo evene' mukita nene voka' voka' ogovo' neivosa a'minete nene O'moso opo'ni lika' lika' i'mi viivo' nizavo eze guvele nene vo naba goloso o'mo vo minelive losa nene ne'mine oga' nounge.

*Me Misubou' Ningaa' Nounge' Inite' Osu' Laa' Neine' Malo' Nene Lehete Amo Alinge' Dalone' Inite' Osu' Lamiline' Malo' Nene Gele Mu'musi'*

*Ogo Mino Geni Lelita Neivosi Nene Gosele' Lebe-  
lamivosa Minaa' Nouné Lo Paulo' Line' Gamazi*

<sup>16</sup> Ne'mine o neine' nenako nemu' nene laza gono daakumu' gosele' osa'mune. Ee, okode losuvola amuzote neve nene labuluvo olosa api' o'mo novivosi gamene gamene lute nene gosoho' oka' oka' o'mo novive. <sup>17</sup> Naza ne'mine noluvoni' nene laza ne'mine mana'mine geni muki' leli' gehelone' o neine' nene mo ngomo ha nite' mino gamene li'nibemukovo' ne neive. Ido' a'mine ne'mo nene inite' naba a'mine geni muki' nene ivile' ogo minine' ado' minevo' alevo' lamine' goloso osu' lamiline' nene do soto' o-lede'mo novive. <sup>18</sup> Ee, laza ninge none' inite' muki' nene gamene li'nibemukovo' minosa nene osu' laa' neine'za ningamune' Okulumoku' inite' nene minevo' minevo' inite' nizave. Nemu' nene ninge none' initeti' nene lute gate molamo asi ningamune' initeti' nene lute gate molaa' nouné.

## 5

<sup>1</sup> Ido' ne'mine ogo minaa' nouné' nene nemu' ve: Seli numuno ngu'vosi milaa' naani' ne'mino me misubou' minine' numude leli' okode ma osu' liline' nene numude gohi ma neine' nene evenelite a'inedunu' gizamani' asi Okulumoku' minevo' minevo' iline' numuno. O'moso'mo salani molo-lede neine' nene ma neive. <sup>2</sup> Ee, laza misubou' okodesi noningu' mene Okulumo' numude nene do ti' ogo saketi ne'mino do ngolaloinako lo agae, agae lo le' izo minaa' nouné. <sup>3</sup> Ne'mine oga' nouné' nene a'mine Okulumo' numude nene saketi ne'mino do ngolosa mineso' nene haza baka' ne'mine

okodelo' inite' nomivo minamoloningumu' ve losa nene ne'mine oga' noune. <sup>4</sup> Ee, laza nene agae, agae lo le' izo minaa' noune' nene idise do none' okode mene do hulo haza minelone losa nevoba asi a'mine seli numungu' mene ha geni libilivo mino minevo' minevo' lemeni dameni ne'mo nene a'mine hele vaa' okode ne'mi ebe' dalingumu' nene Okulumo' numude saketi ne'mino ngolaloinako lo agae, agae lo le' izo minaa' noune. <sup>5</sup> Ido' asi've O'moso'mo nene minevo' minevo' lemeni dameni ne'mo hele vaa' okode'mi ebe' nene dalingumu' ve losa leli' nene do va'va' o-ledosa a'mine salani molo-lidine' inite' muki' nene damolonivoba mo dalosune li ningi gililizangumu' ve lo a'minguti' gana' dalonido' o neine' inite' ei' Sikalahu've nene mo lehize-lede neive.

<sup>6</sup> Nemu' nene laza gamene gamene vode vosa'mivo lute amuzo molo minivo ti' lo gele minaa' noune: Laza nene okode meesi ha mino Okulumo' numudela minosa Guvelesi vesi maka' minelonidoti' nene hoto' haza none. <sup>7</sup> Ido' idise Guvelesi vesi maka' minamune luvoni' nene laza idise minevo dovo' ogo noningu' mene eze ninge minosa minevo dovo' ogo nonivoba asi vetedunu' eze ningamosa nene ha gele ele'vole' ogovo' nene none. <sup>8</sup> Ee, laza nene vode vosa'mivo lute amuzo molo minivo mino laza nene okode mene hulo Okulumo' numudela nene vo Guvelesi vesi maka' minelobo lo gelo minaa' noune. <sup>9</sup> Nemu' nene me misubou' okodesi ha minelobe Okulumo' numudela vo minelobe neukisi nene Guvelesi ve'mo lelikumu' geleine' lamine' ilive losa ei' gilido' ogo molo olosa nene lute molo mino a'minemukovo' nene gono amuzo molo daa'

noune. <sup>10</sup> Ido' Guvelesi ve'mo lelikumu' geleline' lamine' ilingumu' ogo molo minaa' noune' nene laza mukito' Kilisito' zasi gono dalido' nene laza hamo hamo' okode losuvosi minune' gameneu' ogo molo une' initeto' inite' lamine' une' nolihe inite' goloso une' nolihe ne'mi meni've lemelingumu' nene ei' velelo' vo soto' olone' o neine' nenako nemu' nene ne'mino ogo molo minaa' noune.

*Paulo' Aza Kilisitodo' Medelo Mino Lingine O'moso Biluva' I-dani' Nene Huli Ezesi Di Bizilo Lo Evene' Ga'ine Daa' Ine' Gamazi Line'*

<sup>11</sup> Nemu' nene laza Guvelesi vemu' golise geledonido' o neine' nemu' nene gele mino evene' ingine leli' gamazite gililizangumu' nene ga'ine hizaa' noune. Leli' monovote nene mo O'moso'mo gele neive. Ido' monovotemu' nene linginesi ize' mili gilisa a'minemu' gili guni i-lidilizaho lo gelaa' nouve. <sup>12</sup> Ne'mine nolo-lingimune' nene leli' monovote lamine' ve losa a'minemu' gohi lo-lengemelesa lamune. Asi leli' monovotemu' gilikevo lamine' ogavo longolize izilizani' aka nene do soto' o-lengedekunivo evene' ma lu'ningu' minine' monovomu' nene gili huli oko'ine losuvolokovo' lamine' i minilizangumu' nene di naba igi laa' ave nene lingine laza lo-lengemelone' gamazi nene lingimikevo engi' gamazi'ine do'mozelingumu' nene nolo-lingimune. <sup>13</sup> Ve malite lelikumu' nene negi hizikeve li laa' nahe. Ne'mine noolone' nene mo O'mosomu' negi hize nolosune. Ne neiha negi hizamo lute gate laminekisi nolone' nene lengikumu' ve losa nene lute gate laminekisi

mino ogo molo oga' noune. <sup>14</sup> Ido' ne'mine oga' noune' nene Kilisito' lulo leme neine' monovo've ne'mo nene do ote-ledavosa nene oga' noune. Ee, laza ti' lo ize' molo gele none' nenako nemu' nene ne'mine oga' noune: Ve hamo' nene evene' mukito' medelo hiline' nenako nemu' nene evene' muki' nene mo hilani' gele neive. <sup>15</sup> Ido' evene' mukito' medelo hiline' nene evene' ingine angise'inemukovo' igi mili minaa' ani' ma nene huli gohi ne'mine ami a'mine engikumu' helosa ote neive neemukovo' nene igi mili ilizave losa nene evene' mukito' medelo hiline' ve.

<sup>16</sup> Ne'mino neine' nenako nemu' nene laza idise ado' mene none' gameneloti' nene evene' ize' molo-ngedelo ma engi' oko'ine losuvolokovo' ningekosa ize' ma molo-ngedamolosune. Ido' gomu' ma nene Kilisito'ni nene oko'nolokovo' ninge mino ize' molo-dune' noline' nene idise mene a'mine'mine ogo ize' molo-desa'mune.

<sup>17</sup> Ee, ne'mino neine' nenako nemu' nene evene' ma ingine Kilisitoda mini mili nilizave nene mo O'moso'mo do gosoho' gehepeve o-ngede neine' nenako ne'mo ingine gomu' igi mili minani' monovo'ine ma nene mo osu' lavo ngemeni dameni'ine nene, aizo, mo gosoho' gehepeve lolo' ogave. <sup>18</sup> Ido' a'mine noluvoni' inite' muki' nene O'mosolatikovo' soto' ine' monovo ne neive. O'moso aza nene Kilisito' gono dadi'mo nene eze biluva' o-do minuninguti' nene laza ezela ogo do hamo' ogo bizelone' akate vele-ledosa evene' linge nene ezesi di hamo' igi bizilizangumu' ve losa a'mine akalo' ngele'mize molalane' gono nene mo leli' limine' ma neive. <sup>19</sup> Ado' me misubou' aleve O'moso ei' gamazi've avuto' ani'

lihime'ine nene do molo' molo' o-ngedamo Kilisito' gono dangu' nene O'moso aza eita igi di hamo' igi bizilizani' aka nene vele-ngede'mo vo mino a'mine aka'mi gamazi nene evene' muki' li-ngimilizave lo leli' nene do limine' ve. <sup>20</sup> Ido' nemu' nene Laza Kilisito' limiselavo ezelo' medelo mino asi've O'moso nene leli' gamaziteu' mine molo mino lengi' nene gatine dani' gelavo leli' nene Kilisito' liline' velemu' nene leli' medelo mino amuzonga ti' lo nolo-lingimune: O'mosola nene lingine biluva' i-di minani' monovo nene hulisa igi ezesi di bizi minilo. <sup>21</sup> Ido' evene' laza nene Kilisitoda gi'mizo minekunivo ei' O'moso'mi monovo lisihe' gehepeve nene leli' okodela dizo minelingumu' nene O'moso'mo lavo leli' lihimete vai' nene ei' Kilisito' oko'nola dizavo lihime hamokisi ma damive Kilisito' nene lelito' medelo lihimelo' ve lolo' ine' ve. Nemu' nene lingine O'moso biluva' i-di minani' nene huli eita igi di bizi minilo losa nolo-lingidune.

## 6

<sup>1</sup> Ido' laza O'mososi maka' bize mino gono daa' unive nete nene gatine do ti' lo nolo-lingimune: O'moso'mi nasahili've lengemavo di minaa' nani' nene ningi hulikevo vo labuluvo ogalive losa nolune. <sup>2</sup> Ido' ne'mine noluvoni' nene O'moso'mo ti' lo lingumu' nene noluve:  
 Naza gamene lamine' muluvongu' nenita laa'  
                   nani' ma nene  
 mo giluve.  
 Ee, evene' do ngu' izelove lo gamene muluvongu'  
                   nene

hize ele' o-lingiduvoni' ve.

Gililo. A'mine gamene lamine' molani' nene idise mene gamene nene neive. Evene' do lu' izeline' gamene molani' nene idise mene gamene nene neive.

*Lingine Leli' Monovote Lamine' Nene Ningilizave Losa Aposolo Laza Geni Ato Ato' Gehaa' Noune Lo Paulo' Line' Gamazi*

<sup>3</sup> Laza nene goloso gidini geleline' monovo ngomosi nene ma okunivo a'mine mono' gono nodune' nene evene' nete divi ledivika li mono' goloso ve likelizave lo evene' hamolitesi olovo' ilizado' o mineline' inite' nene mo keke' amoovo' minaa' noune. <sup>4</sup> Asi laza nene O'moso'mi gonolo' ve ne'mine none' nene evene' do soto' ogo ngelebizelesa nene ado' ne'mine monovo lamine' nene ogo minaa' noune: Laza nene geni inite' ato ato' ne'mi lulou' minaa' noube, ido' lihitehe' inite' gehepeveli'mi lulou' minaa' noube, ido' do goloso o-ledaa' initeli'mo nene akate gize osu' lavo minaa' noube, ne'mine ogo minaa' nouningu' nene lemo ongamo amuzo molovo' minaa' noune. <sup>5</sup> Ido' di goloso igisasi nene libilaa' nave. Ido' nala' numungu' nesi nene huli-lidaa' nave. Ido' evene' gulugulunga li lovo di soto' i-lidilisasi nene iga' nave. Ido' gonosi nene amuzo molo daa' noune. Ido' okisete nesi nene do guno ma ongosamune. Ido' noso' nite' nesi nene do lamino nasa'mo ga'nasi nene helo minaa' noune. <sup>6</sup> Ne'mino minoosa monovo lamine' golosovo' nesi nene ha ogo mino gele nge lo minaa' monovo nesi nene do minaa' noune. Ido' laza nene hongu loovo' mino evene' nasahili' o-ngedo mino

O'moso'mi Sikalahu've nesi nene lelita minevo dovo' ogo neivo mino evene' lute ngemo minaa' nounge' nesi nene abeleni amo mino<sup>7</sup> Ido' gamazi gihile laminekovo' nesi nene lo mino O'moso'mi amuzo lelita minine' nesi nene do soto' o'mo vo mino monovo lisihe' lamine' gehepeve ne'mo nene lovou' initete ne'mine lolo' ogavo ade hela adavala nene lepesete ne'mine ne neivo ido' ade hela zamela nene bainati mitete ne'mine ne neivo minaa' nounge. <sup>8</sup> Evene' linge ma nete nene di naba i-lidaa' naavo ido' linge ma nete nene di limi-lidaa' naavo monaa' nounge. Ido' evene' linge ma nete lelikumu' nene lemenga laa' naavo linge ma nete nene lopo'ni laa' naavo monaa' nounge. Ee, evene' linge ma nete lelikumu' nene evene' go'ine iza' ave ve li laa' naaha laza nene ne'mine amo soza nite' osa'mune. <sup>9</sup> Ido' evene' ma nete lelikumu' nene gililisa ma gilisa'maha evene' muki' nete lelikumu' nene ningi gili lamine' goloso i nizave. Ido' lelikumu' nene mo hililisaave li gili minaa' naaha ido' mene vetesi ha none' nene mo haza ne none. Ido' li-himetemu' ve lo mulumo gono nene ne'mino daa' nouba a'mine ne'mo nene lebele helesa'mive. <sup>10</sup> Ido' mulumo gele minuningukisi nene gamene gamene lolize izovo' minaa' nounge. Laza nene ve goho' gahali' ne'mine none'za monoku' evene' muki' nene heneni ve ne'mine lolo' o-ngedaa' nounge. Henenite nomiņe' minaa' nounge'za inite' mata' nene lelita ha neivosa minaa' nounge. Ido' ne'mine ogo mine do vaa' nounidoti' nene laza O'moso'mi gonou' ve minaa' nounge' nene soto' o minivo ningilizave lo ne'mine oga' nounge.

<sup>11</sup> Agae, lingine Kolidi alevkizo, gamazi nene



ma do halekamo mo lo ngolokovo' lo lo-lengeme osu' lokune. Laza lute lengeme none' nene mo nabalo' goloso lengeme none. <sup>12</sup> Ee, leli' nene lute lengemaato' do a'manapa ma amune'za langisetine lengi' lutine nene di a'manapa igi leli' nene lutine limi lamine' amave. <sup>13</sup> Ido' lingine neni' izipaha'ne ne'mine gili nizavo ti' lo nolo-lingimune: Laza lute ne'mino lingimune' malo' nene golo hizi lutine di gili' lami limi lamine' ilo.

*Evene' Nene O'moso'mi Numu've Ne'mine Nounako O'mosomu' Gilamave Nesi Nene Bizi Monikelizave Lo Paulo' Line' Gamazi*

<sup>14-15</sup> Ado' monovo lamine' oga' monovosi ido' monovo golosolo' vaa' monovosi nene gono di hamo' mili dikesivo monovo'ine nene lisi-hetokovo' vilihe vamilive. A'mine noluvoni' inite' labanakisi liti'musosi engi' monovo'ine nene hamoli'mine monovo igi mili isa'masive. Ido' a'mine'mine ogo Kilisito'nimu' gili ele'vole' ave nesi ido' ezemu' gili hulaa' ave nesi nene hamo' akalo' ngeli ma e'metamilisaanako nemu' nene lingine Kilisito'nimu' gili hulaa' ave engikisi nene maka' moni engi' iga' ani' monovo nene lingine igi mili ikelizaze. Engikisi bize lamine' igi minamilo. <sup>16</sup> O'moso'mi kekeize numu've nesi ido' soza o'mososi di hamo' ilisido' nene ma vo damive. Ido' ne'mine noluvoni' nene minevo' minevo' O'mosoli'mi numu've nene leli' none' nenako nemu' noluve. A'minemu' nene O'moso'mo ti' lo lo neine' ma neive:  
Naza nene engi' vovo'ningu' ogo minevo' alevu'  
ogo mino  
mono minelesuve.  
Ido' O'moso'inesi nene lolo' ogo minelesuve.

Ido' ingine neve nene neni' evene'ne zuho minil-  
isave lo neine' ma neive.

<sup>17</sup> Nemu' nene Guvelesi ve'mo ti' lo nolive:

A'mine nenikumu' gili ele'vole' amaveti  
vovo'ningu' minanguti' nene

lingine huli mine abaza' igi mini

goloso nite' nene damilo.

Ne'mine ikevo naza lengi' nene do nenita ogo

<sup>18</sup> metibo lolo' okuvo

lingine nene neni' gipe alu minilisave lo

amuzo've atoli'minesi minive Guvelesi ve'mo  
nene line' ve.

## 7

<sup>1</sup> Lu'ne lengeme nouvoni' alevékizo, a'mine gamazi mene ne'mino O'moso'mo lo huko-lede neine' nenaze. Nemu' nene laza okodesi lutesi do goloso o-ledeline' monovo muki' gilito do hulosa O'mosomu' golise gelo mino mudise monovo lisihe' lamine' gehepevevo' nene ogo molo o'mo vo minuke'zo.

*Kolidi Aleve Lu'ine Di Velepe' Izangumu' Paulo' Lulou' Olize Soto' Ingumu' Line' Gamazi*

<sup>2</sup> Lingine leli' nene di lutingu' milalo. Ne nanitekumu' ve. Laza lengikuti' evene' hamokisi ma do goloso o-ngedamune. Ido' evene' hamokisi nene aka golosolo' ngele'mize molamo ido' evene' hamokisi go'ine izo inite'ine nene ma do lelita amune. <sup>3</sup> Ido' ne'mine luvoni' nene lengele-mosa lamuve. Helelone' nehe ha minelone' nehe, lengi' nene luteu' do molo-lengedamo mino ne'mine ogalone losa lengi' nene mo mudise luteu' do molokune lo gomu' mo ma lo-lengeme nouvoni' ma neive. <sup>4</sup> Naza lingine gamazi nene

ha gililizado' i nizave losa lengikumu' nene gele ele'vole' o mino ne'mine mana'mine lo ha lo-lengemaa' nouve. Ido' lengikumu' nene nolize goloso izo mino do naba o-lengedo minaa' nouve. Lengi' monovotinemu' giluvo lamine' ogavo mulu'neu' nene lamine' goloso o neivo geni ato ato' gehu minuningukisi nene lu'neu' gulumo atoli'mine ogo lisivosa nouve.

<sup>5</sup> Ee, ido' Makedonia misubou' une' gamene nesi nene okode ma molo gelo mineso' nite' ogavo ma minamune'za asi ganala geni inite' ne'mo nene a'midati' a'midati' okodela nene dizovo' minive. Ado' okode losuvoloti' nene lovo lolize nene ha ogo mino luteu' neve nene golise gelo minune. <sup>6</sup> Ne'mino minune'za geni initeli'mi lulou' mini gopo ga'ine gili nizangu' do hongu lo-ngedaa' ive O'moso ne'mo nene Tito'ni aka vele-do imiselavo nonida ogo hetelidi'mo golise gelo minune' nene do hongu lo-lidive. <sup>7</sup> Ido' ne'mino do hongu lo-lidine' nene ei' Tito' adi'movo' ne nomive. Asi aza lengita vo hetelo lengita geni minine' nene di lisihe' ikeni' neivo ningosa a'minemu' geni biline' nene mate-do mulunou' lamine' ogavo a'minemu' gamazi do ani' ne'mosi nene do hongu lo-lidine' ve. Tito' nene lingine neni' ningeso' lingisivo nizani' nemukisi ido' goloso nite' soto' ingumu' agae, agae li minaa' naani' nemukisi ido' neni' gamazi'nelo' e'metilisa amuzo mili gilaa' naani' nemukisi lo-limine' nenako ne'mo nene lu'neu' gulumo lisine' nene vo naba goloso ine' ve. <sup>8</sup> Gomu' luhuvo niteku' gizuvoni' gamazi ne'mo muludingu' agae li okodido' gili

mulumo gilani' noline' nesi nene naza lu'ne ga'ne nene do ato' ma amuve. Ee, a'mine luhuvo nite' nene ningi lutingu' mulumo gilani' nemu' nene mo ningo gelekuve. Ido' a'mine lutingu' mulumo nene gilani'za neve nene mo gamene li'nibemukovo' gilani' noloseive. Ido' lu'ne ga'ne do ato' amuve luvoni' nene lingine lutine di velepe' izangumu' nene naza olihe gelamosa gomu' lu'ne ga'ne do ato' uvoni'za idise nene ma do ato' amuve. <sup>9</sup> Asi idise nene mo nolize izo nouve. Ido' nolize izo nouvoni' nene lingine luhuvo ningi okodido' gili mulumo gilangumu' nevoba asi mulumo giladoti' lutine di velepe' izani' nemu' nene nolize izo nouve. Lingine okodido' gili mulumo gilani' nene O'moso'mo gele neido' vo dani' nenako a'mine gamazitemu' mulumo gilani' ne'mo nene ma do goloso o-lengedamine' ma neive. <sup>10</sup> Ne'mine noluvoni' nene O'moso'mo gele neido' ogo okodelo' gelo mulumo gelelonidoti' nene lute do velepe' izo lukuvo nalone' nenako nemu' nene a'ne'mino okodelo' gelo mulumo gelaa' nounce' nene goloso ve lo lamolosune. Ne neiha O'mosomu' gilamavetida ne'mino oko'nido' gili mulumo gilaa' soto' o-ngedaa' neine' ne'mo helaa' nene do soto' o-ngedaa' neive. <sup>11</sup> Naza noluvoni' nene mo lamine' noluze. Lingine ma ningi'nalo. Ado' lingine a'mine'mine igi O'moso'mo gele neido' igi okodido' gili mulumo gilani' ne'mo nene lengita monovo lamine' tamine' vai' goloso do soto' o-lengedave. A'mine nene ado' gilingili igi monovotine lisihekovo' minelive li lutine a'mido' milaa' monovo nene atoli'mine ogo do soto' o-

lengedavosa lingine a'mine gamazitine nene di lisihe' ilisa amuzo mili minii goloso monovo di hulilisa lite' li upuho' igi minii golise gili minii leli' ningelobo li gili minii goloso nite' dave nene lihime imilisa amuzo mili minani' ve. Nemu' nene a'mine lengita minine' gamazi mamu' nene gilunivo a'mine luvoni' monovo muki' lingine igi mili minadi'mo nene lihime lengita minamine' nene do soto' ogave. <sup>12</sup> Ido' gomu' luhuvo nite' gize-lingiduvoni' ma nene lihime davemu' gelo gizuvoni' nomive. Ido' lihime do-divemu' gelosa gizuvoni' nomive. Asi lingine lutine lelita milani' amuzo goloso milisa milani' monovotine nene ningilizave losa O'moso'mi velelo' ne'mi monovo nene lengelebizosa gizuvoni' ve. <sup>13</sup> Ido' muludeu' lamine' gilune' nene idise mene noluvoni' initekumu' nene lamine' gilune.

Ido' lingine muki' nene Tito' lulo di hongu li-dangumu' olize izo minine' ne'mo nene a'mine muludeu' lamine' gilunido' nene imine' molo lazasi gohi lolize naba izune. <sup>14</sup> Ido' lolize izune' nene naza lengi' do naba ogosa Tito'ni gamazi gomu' lo-imuvoni' nene hazamu' nomine' nenako novozo nene ma helamuvoni' nenako nemu' nene mo lolize izune. Ee, naza lengi' gamazi lo-lingimune' nene mo gamazi gihile lamenetokovo' lo-lingimune' ne'mino lengi' nene do naba o-lengedo Tito'ni lo-immune' gamazi nene lamenetokovo' lo-immune' nenako a'mine nene mo lamine' gihile izave. <sup>15</sup> Tito' aza lengita ogo no-hetelivo lingine muki' golise've gili luvo luvo izi mini ele'mize lamine' igi gamazi'velo' e'metani' mamu' nene aza gohi gele mino lulo've nene

atoli'mine ogosa lengita hulo neive. <sup>16</sup> Ido' naza idise nene giluvoni' lingine nene inite' mukiku' monovotine nene mo lisihe' ogavo minilisave losa giluvo mo mu'musi' gehepeve ogavo nemu' nene nolize goloso noizuve.

## 8

*Izesu' Evenele Zudaia Misubouko Minanguti' Goho' Gahali' nGemelone Li Makedonia Aleve Moni Inele Igi Di Nubo Adi'mine Igi Linginesi Ma Di Nubo Igi Milalo Lo Paulo' Lo-ngimine' Gamazi*

<sup>1</sup> Neze zuhokizo, ingine Izesu' evenele zuho mulise Makedonia misubou' mini'mi monavela O'moso'mi nasahili've ne'mo gono do gihile've do soto' ine' nemu' naza gililizave losa nene lo-lengemelouve: <sup>2</sup> Ingene nene geni inite' nabali'mi lulou' minangukisi ido' angise'ine nene goho' gahali' gehepeve minangumukisi nene gili huli monokumu' atoli'mine igi ngolize izi minadi'mo moni nene naba inele igi di nubo ani' ve. <sup>3</sup> Ido' ingine a'mine moni di nubo ani' nene ingine hulilizado' o minine' moni nene hulani'za a'mine votigile nesi nene ivile' ivosa vauve ili masi hulani' nemu' naza gele lamine' ogosa nolo-lingimuve. Ingene engi' lu'nido' di mili <sup>4</sup> geli geli igi amuzonga ti' li limani' ve: Agae, lingine gili limikevo a'mine O'moso'mi evenele hizi ele' i-ngidilisa moni di nubo ilizangu' lazasi nene ma hulolosune. <sup>5</sup> Ee, ingine ne'mine ilisave lo gilunido' avoba asi engi' nene gomu' Guvelesi ve lehizi-mikii alinge' nene lelitasi gelekele' i-lidani' ve. <sup>6</sup> Ne'mine ani' nenako ido' Tito' ne'mo nene gana' api' ogo

lutine do ote-lengedavo lingine Izesu' evenele nasahili' i-ngidilisa a'mine gono nene api' ani' nenako nemu' nene Tito' aza a'mine gonolo' vo gizebo ivo di pililizave lo amuzonga lo-dekune. <sup>7</sup> Lengita mono' monovo muki' nene vauve elo neive. A'mine ado' lingine gili ele'vole' igi mini mono' gamazi di lamine' igi li soto' igi mini monokumu' gili hehe li mini a'minemu' gilingili igi mini ido' laza lutine do ote-lengedekunivo lutine leli' limi minaa' naani' ne neive. Nemu' nene a'mine nasahili' o-ngedaa' gono nesi nene amuzo mili dalizado' o neive. <sup>8</sup> Ido' ne'mine noluvoni' nene naza lo huko mo ne'mine ilizave losa nolo-lingiduvoba asi evene' malite a'mine gonomu' gilingili igi minani' monovo'ine nene lo-lengemekuvo ne'mo nene do ote-lengedavo lingine lutine ngimaa' naani' nene mo abeleni isa'mii mo ne'mine iga' nani' nene soto' ilive losa nene ne'mine noluve. <sup>9</sup> Ido' ne'mine ilizado' o neive noluvoni' nene lingine Guvetesi ve Izesu' Kilisito' nasahili' o-lede neine' monovo've nene gili nizanako a'mido' e'metilizado' o neive losa ne'mine nene noluve. Aza nene inite' mata' muki' do minine'za a'mine do a'manapa amo naza goho' gahali' lolo' okuvo ne'mo nene lingine inite' mata' muki' di minilizave losa lengikumumu' nene goho' gahali' ne'mine lolo' ine' ve. <sup>10-11</sup> Ido' a'mine gamazi memu' nene naza ga'neu' giluvoni' nene ma lo-lengemelove: Ma kilisimasi mau' nene lingine ne'mine gono dalone li mo gana' api' igi dani' ma nene mo lutine lamine-toti' dani' ma neive. Nemu' nene a'mine gonotine nene lingine gana' amuzo mili dalisa gili dani' ma'mine igi lengi' initetine'mi votigilelo'

di milisa lite' li di osu' lilizani' nene mo lamine' oloseive. <sup>12</sup> Ido' lengi' initetine'mi votigilelo' di milisa ilisave noluvoni' nene nemu' noluve. Ve malite lu'ine otavosa inite' ma lehizi-ngidilisa gilani' noline' nene O'moso'mo gelavo ingine inite' di minani' votigilelo' lehizi-ngidani' nene mo lamine' oga' neive. Aza nene inite' masi lehizi-ngidilizanako lo gelo evene' ingine ma damani' initekumu' nene ma gelo losa'mive. <sup>13</sup> Ne'mine noluvoni' nene evene' ma hize ele' igi di ngu' izikevo lengita geni ilive losa nomive. Asi lisihe' lisihe' igivo' minilizave losa nene noluve. <sup>14</sup> Ido' idise meve lengi' initetine vai' lo neine' ne'mo nene inginela nomine' inite' nene hize ele' o-ngedeleseive. Ne'mine oloseinako ingine gamene vilido' nene ingine inite'ine vai' lo minelinguti' nene linginela nomiline' inite' nene hize ele' o-lengedeleseive. Ne'mine ogavosa lingine mukito' nene lisihe' lisihe' igivo' minilisave. <sup>15</sup> A'mine nemu' nene mono' godolou' ti' li gizi nizado' vo daloseive:

Noso' nite' vai' di nubo ave nete nene noso' nite'ine nene lumosi ma milisa'mave.

Ido' noso' nite' ngomovo' di nubo ave nete nene noso' nite'ine osu' lavo noso' nite'ine vise' ma isa'mave.

*Di Nubo Ani' Moni Maka' Do Vo nGemelonive Titokisi Ido' Mono' Aleveuti' Di Oti-ngidave Sitakisi Lengita nGimiselekunivo Igi Hetelilisave Lo Paulo' Line' Gamazi*

<sup>16</sup> O'moso'mo Tito' lulo do ote-davo laza hize ele' o-lengedelesa gilingili ogo none' ne'mino Tito' nesi nene gilingili ogo neivo nemu' O'moso isaa' neve nolo-dune. <sup>17</sup> Ee, laza lengita vilive



lokunivo gele limine'za asi've mo lengita volosa gilingili ogo gele neido' nene luune' ve. <sup>18</sup> Ido' Titokisi vilive lo leze zuho masi noimiselunive nene mono' mulise muki' mini'mi monani' nete nene mono' gamazi lamine' lo soto' soto' oga' neingumu' nene opo'ni li di naba i-daa' nave ne neive. <sup>19</sup> Ido' neevo' nomive. Ado' mono' mulise ato ato' vai' nete nene a'mine nasahili' i-ngidi moni di nubo ani' do vo ngemeloningu' nene ezesi a'mine gonolo' hize ele' ogo lelikisi maka' vilive li di oti-dani' ve. A'mine gono dalone' nene a'mine gono dokunivo a'midoti' nene evenelite Guvelesi ve di naba i-dilizave losasi ido' leli' lute ne'mo goho' gahali' hize ele' o-ngedaakumu' ote neine' nene do soto' ilive losasi nene dalosune. <sup>20</sup> Ido' lengita noimiselune' nene a'mine inele igi hulani' moni nabamu' gono daloningumu' nene evene' hamolitesi di gopo ikeve li lemenga li lelemikelizave losa a'mine aka hize tileloningumu' nene noimiselune. <sup>21</sup> Nene nanitekumu' ve. Laza ne'mino monovo lamine' oloningumu' nene O'moso'movo' gelevivoba asi mo evenekisi nene gililisave losa nene ne'mino lovo gizo do lisihe' okune. <sup>22</sup> Ido' a'mine ve sitakisi nene leze zuho gohi masi noimiselune. Gamene muki' a'mine ve nene gono ato ato' doka' doka' ingu' monovo've nene mo do ningekune. Aza mono' gonou' nene gilingili ogo minaa' neive. Ido' idise mene lengikumu' nene monoku' ele'vole' ilisave lo gele mu'musi' gehepeve o neine' nenako nemu' nene a'mine gono nene dalosa mo gilingili ogo amuzo goloso nomolave. <sup>23</sup> Ido' Tito' neve nene nezese bizo gono makato' daa' usive nene

neive. Ido' leze zuho sita' ingine nene mono' mulise ato ato' nizado' nene di medeli-ngidi a'mine gonolo' ngimiselave sita' nene Kilisito'ni di naba i-dilisido' i nizasive. <sup>24</sup> Nemu' nene ingine nivavo ma lengi' lutine ngimaa' monovotine ne'mi gihile'vesi ido' laza lengi' do naba o-lengedo lo-ngimune' gamazi ne'mi gihile'vesi nene ningilizaze. nGelebizilo. Ee, mono' mulise ato atoku' aleve nete a'mine monovotinemu' nene ningi gililizangisi ngelebizilo.

## 9

*O'moso'mi Evenele Inite' Lehizi-ngidilizani' Votigilelo' Nene O'moso'mo Do Tine' Molo Lengemeleseinako Ha Inele Igi nGimilizave Lo Gohi Paulo' Line' Gamazi*

<sup>1</sup> Izesu' evenele Zudaia misubola minani' nene hize ele' i-ngidi moni hulilizangumu' do ote-lengedo gamazi lo-lengemeloni' nene lingine mo a'minemu' gili nizani' nenako a'minemu' nene gohi luhuvo gize-lengedelodo' nomize. <sup>2</sup> Asi lingine ne'mine ilisa gilingili igi nizani' nemu' nene mo gele nouvoni' nenako nemu' nene lingine Akaia misubou' aleve nete gomu' kilisimasi mauti' nene ne'mine ilisa di va'va' igi nizani' ve lo Makedonia misubou' aleveti ve'nido' nene do naba o-lengedo minaa' nouve. Lingine ne'mine igi gilingili igi minani' ne'mo nene engikuti' linge muki' nene ne'mine ilizado' do upuho' o-ngedave. <sup>3</sup> Ne neiha laza lengi' do naba o-lengedo lo-ngimune' gamazi nene vo haza gamazi lolo' ogalive loosa naza lo-ngimuvoni' ne'mine igi lingine inite' muki' di va'va' igisa

nizani' neivo ogo hetelelone losa a'mine leze zuho nene ngimiselekuve. <sup>4</sup> Ee, laza Makedonia aleve lingesi ogo hetelo lingine di va'va' igi minami haza nizavo ningelone' nene lingine mo di va'va' igi minilizave lo gele mu'musi' o minune' nemu' nene lovozo helalone losa ngimiselekuve. Ido' neve nene lengikumu' lamuvoni'za linginesi nene longovoza hilamilizado' o neihe. <sup>5</sup> Nemu' nene ingine gomu' mili vi lingine inele igi ngemelone li gomukuti' li hukani' inite' nene ganakuti' di lisihe' ikevo minelive lo gelosa naza gomu' mili vilizave lo a'mine leze zuho nene lo-ngedelodo' o neive lo gelosa ne'mine uvoni' ve. Ne'mino gomukuti' di va'va' ikevo minele' ne'mo nene lingine ngimilisa gilamado' lelitati' amuzo molokunivo ngimamani'za asi lutine laminetoti' inele igi hulilizani' nene mo soto' ogo mineleseive.

<sup>6</sup> Nemu' nene naza gamazi mene lolouze. Gililo. Ve ma ingine zuho nite' ngomo lasolo zuho' ilizani' nene a'minguti' ngomo lasolovo' dolizilisaave. Ido' ve ma ingine zuho nite' vai' zuho' ilizani' nene mo vai' goloso dolizilisaave. Nemu' nene ngimiliza votigilelokovo' nene dika' dika' ilisave. <sup>7</sup> Evene' ma ingine lu'ine laminetoti' ngolize izi mini inite' ngimaa' navemu' nene O'moso ne'mo umo helaa' neine' nenako nemu' nene lutingu' hizilizado' e'meti lutingu' geni lengebele minivo ngimami lingine hamo hamo' mukito' lutingu' ne'mine ngemelone li gilani' votigilelo' nene mo lutine laminetotikovo' ngimilo. <sup>8</sup> Lingine ilizado' o neine' inite' muki' ha vo daline' votigilelo' nene inite' muki' len-

gita gamene gamene ha neivo gono lamine' ato  
 ato' muki' nene ha dalizado' i minilizangumu'  
 ve lo O'moso'mo ei' nasahili'veuti' nene inite'  
 mata' muki' vauve elo lehize-lengedelido' lisihe'  
 o neive. <sup>9</sup> Neve nene mono' godolou' ti' li  
 gizikani' neine' malo' nene vo dave:

A'mine ve nene inite've ha inele ogo ize' molo  
 goho' gahali' lehize-ngedave.

A'mine monovo've lamine' nene mo osu' lamo  
 minevo' minevo' ogo mineleseive.

<sup>10</sup> Mine zuho' ilizave zuho nite' nene do soto'  
 ogo ngemosa nalizave lo noso' nite' lemaa' ive  
 ne'mo lengitati' ngimiliza nite' nene do naba ogo  
 do hutile' ogo monovotine lamineli'mi gihile've  
 nene do vai' lo'mo vo mineleseive. <sup>11</sup> Ne'mine  
 ilidi'mo nene lingine inele igi inite' ngimika'  
 ngimika' igi minilizangumu' inite' matatine nene  
 do vai' lo-lengedavo mini laza a'mido' do up-  
 uho' o-lingidune' gono dalizadi'mo evene' nete  
 O'moso nene opo'ni li isaa' neve li-dilisave.

<sup>12</sup> Ido' ne'mine noluvoni' nene lingine evene'  
 hize ele' i-ngidaa' gono nidani' me'mo nene  
 O'moso'mi evenele vise' iga' naani' inite' nene  
 do soto' o-ngedaa' neine'za neevo' nomive. Asi  
 a'mine gonomu' nene evene' muki' nesi nene  
 vauve ili O'moso isaa' neve laa' naanako nemu'  
 nene noluve. <sup>13</sup> Ee, lingine Kilisito'nimu' gamazi  
 lamine' gele ele'vole' okune lani' ma nene soza  
 nomine' lamineto' lani' nene di soto' igi a'mine  
 gamazilo' gelekele' igi lengi' initetinguti' nene ma  
 ize' mili inele igi engikisi ido' evene' mukikisi  
 lehizi-ngidii a'mine gono mene dikevosa ne'mo  
 nene evene' O'moso opo'ni lilisave. <sup>14</sup> Ido'

O'moso'mo nasahili' atoli'mine ogo lengita do soto' ingumu' nene ingine lengita lu'ine mili mini lengikumu' ve li O'mosola lilisave. <sup>15</sup> Ido' O'moso'mo nasahili' o-ledo inite' ine' nemu' nene isaa' neve lo-duke'zo. A'mine inite' nene atoli'mine ogo lamine' goloso neivo a'minemu' nene lolone lo ma loso' nene mo ngelo lo pelam-olosune.

## 10

*Evene' Malite Paulo'ni Di Limi-di Lani' Gamazilo' Nene Aza Do Velepe' Izo Ei' Monovo've Hize Ele' Ogo Line' Gamazi*

<sup>1</sup> Neni' Paulo' nene Kilisito' aza hongu lo muluno laminekisi minine' mamu' nene gele mino agae lo gatine do gamazi ma lo-lengemelove. Ee, lingine linge malite nenikumu' nene leli' vovoteu' mino gamazi amuzo molo lo-lemelido' minamo honguvo' lo minaa' neiha vo mala mino luhuvo gize-lidingu' nene gasava ve ne'mine lolo' ogo mino olo' lo vine' gamazivo' laa' neive li li-nidaa' ave neni' nene agae lo ti' lo nolo-lingimuve: <sup>2</sup> Neni' monovo'nemu' giluvoni' nene naza nehelele izamivo mino ve linge ma lelikumu' nene ha me misubou' veliti monovolokovo' e'metaa' nave li li-lidaa' ave nene ha do lisihe' o-ngedelodo' o nouve lo gele nouve. Ne'mino nouvoni' nenako lengita ogo gasava ve ne'mine mino amuzo molo-lengedaaloze. Ne'mine olodo' o minine' gamazi nene mo hulilo. <sup>3</sup> Lamine' laza nene mo ha misubou' ve none'za monoli'mi lovou' lovo oga' nounce' nene me misubou' vete iga' ado' do molo lovo

osa'mune. <sup>4</sup> Nene nanitekumu' ve. Laza lovo oga' nounge' inite' nene me misubou' initedunu' lovo amo asi O'moso'mi amuzosi minine' inite' ado' biluva' alete molo-ngedeline' gamazi'ine nene hupu' ize hulilido' o minine' amuzo nene do none. <sup>5</sup> Ee, gamazi'ine bele hulo ido' O'moso'mi monovomu' ningi gililizani' aka hize tilaa' neine' amuzo malehe gamazi'ine naba nesi nene ha belo do'mo lemaa' nounge. Ido' evenelite ga'ine gilaa' inite'ine muki' nesi nene doosa a'mine ga'ine gilaa' inite'ine nene Kilisitoda do gelekele' o-ngedaa' nounge. <sup>6</sup> Ido' ingine nene mudise lelito' gelekelele' gehepeve ikevo ma laza nene evene' linge ma gamazi gili hulika' hulika' ado' ado' nene golo hizo lihime ngemelongumu' nene mo do va'va' ogo none.

<sup>7</sup> Lengi' vetido' soto' mene soto' o neine' inite' nene ningahe ningamave. Alo' ningilo. Evene' ma zaho nolihe aza eikumu' nene naza Kilisito' evenele nouve lo gele ele'vole' o minelive ne'mo lelikumukisi nene naza Kilisito' evenele nouvoni' ne'mino inginesi nene Kilisito' evenele nizave lo gele minelido' o neive. <sup>8</sup> Ido' Kilisito' evenele nouve lo noluvodo' nene imine' moloo loloni' votigile ivile' ivosa Guvelesi ve'mo nimine' amuzo nene do naba ma oloni' ne-mukisi nene novozo ma helamolosuve. A'mine amuzo Guvelesi ve'mo nimine' nene do goloso o-lengedelongumu' nene nimivoba asi monoku' hize ele' o-lengedelongumu' nene nimine' ve. <sup>9</sup> Ee, Guvelesi ve'mo nimine' amuzo nene novozo helamo ha do naba oloni'za naza luhuvo nite' gize-lengedaa' nouvongu' nene golise lengemeline' gamazivo' gizaa' nouvoni' gelalive losa

nemu' nene gele nouve. <sup>10</sup> Nene evene' linge nete ti' li laa' nangumu' nene noluve: Aza luhuvo gizeline' nene amuzo malehe gamazi genivesi gamazi gizaa' neiha ei' omo neivo ningelone' nene oko'no gilizevo o vine' mino gamazi've line' nesi nene amuzo'vesi nomine' gamazi laa' neive laa' nave. <sup>11</sup> Ne'mine li laa' ave nene ti' li gili minilizave: Lengikisi maka' minamo luhuvo nite' gizeso' nene a'mine luhuvo niteku' gamazi amuzo molo gize nolone' ne'minosa laza linginela ogo hetelo ogo molo olone' nene a'mine luhuvo niteku' lolone' ne'mino gehepeve ogo molo olosune.

<sup>12</sup> Lengita minave linge nete nene engi' oko'ine di dizi dizi' igi evene' ma ne none laa' nave. Laza engikisi lelikisi nene do milise' ogo ningo engito' lisihe' o none lo mo keke' lamolosune. Engikumu' nene lehelele izamine'za ingine nene engi' monovo ize' mili ningaa' nani' nene O'moso'mo line' gamazisi di milise' igi ningami angise'ine gilaa' nani' gamazisi nene di milise' igi ningi ize' mili mo evene' naba none li negi suno daa' nanako nemu' nene laza engito' lisihe' o none lamolosune. <sup>13</sup> Leli' monovotemu' do naba olone' nene lisihe' o neine' votigile nene ivile' ogo gohi ma do naba amolosune. Ido' leli' gono dalonido' nene O'moso'mo asi've laka'ni molo-lede neive. A'mine laka'nitelokovo' mino gono daa' nounge' neemukovo' nene do naba ogo lolosune. Ido' lengita vo gono dune' ma nene a'mine O'moso'mo laka'ni molo-lidine' nene mo a'midasi vo do neivosa nene dune. <sup>14</sup> Ee, laza lengita ogo Kilisito' gamazi lamine' leli' neve gana' api' ogo lo-lingimune' nenako nemu' nene

lengita gono dune' nene do naba oloningumu' O'moso'mo molo-lede neine' votigile nene ivile' amolosune. <sup>15</sup> Evene' atolite dani' gonomu' nene leli' okode do dizo O'moso'mo molo-lede neine' votigile nene ivile' amolosuune'za laza lengikumu' nene ti' lo gele mu'musi' o none: Lingine O'mosomu' gili ele'vole' ani' nene mo amuzo molo'mo vo neivo leli' gonote ne'mo lengita nene vauve elo vo naba ilive. <sup>16</sup> Ne'mine ogavo lengi' mehedida minine' misubolasi nene vo evene' gohi masi nene Kilisito' gamazi've lamine' nene lo-ngemelesune. Ne'mine olosune'za laza evene' malite vi gono dikengu' nene vo gono damolosune. Ido' evene' malite gono dangumu' leli' okode nene do dizamolosune. <sup>17</sup> Nemu' mono' godolou' ti' li gizi nizani' ma neive: Ve ma aza ei' oko'nomu' olize noizeline' ne alamo Guvelesi ve neemukovo' nene olize izelive. <sup>18</sup> Mene noluvoni' nene nemu' noluve: Evene' gihile minelive nene ei' oko'no do dizaa' ive minelivoba asi Guvelesi ve'mo do naba o-dive ne'mo nene evene' gihile mineleseive.

## 11

*Paulo' Aza Kolidi Aleve Soza Aposolo nGe'metikelizave Lo Engikisi Eikisi Do Milise' Ogo Ningo Eikumu' Nene nGivile' O Nouve Lo Monovolo Lo-ngimine' Gamazi*

<sup>1</sup> Gamazi ngomo mene lo-lengemeloni' nene negi monovolo' e'metelesuha lingine nemu' gosele' lengebelamivo ha gopo gililizahoo lo gele nouze. Lingine gopo a'mine gamazi'ne nene gililo. <sup>2</sup> Ido' negi monovolo' e'meteloni'



nene O'moso'mo lengikumu' ei' inite'vevo' minilisave lo amuzo molo gele minaa' neine' ne'mino nazasi lengikumu' a'mine'mine ogo amuzo molo gele nouvonako nemu' nene a'mine negi monovolo' e'meto neni' monovo'nemu' do naba ogo lolosuve. Ido' lengikumu' amuzo molo gele nouve noluvoni' nene lingine gopo monovolo' monesa'mine' alu ne'mine mini a'mine ve hamotokovo' vi gi'mizilizave lo Kilisitoda izeni o-lengedekuvoni' nenako nemu' nene lengikumu' nazasi nene amuzo molo gele nouve. <sup>3</sup> Gosiheli'mo Eva'ni do neu' manau' ogo golo izine' ne'mino evene' malite gotine izi lutine gatine di gopo igi lutine Kilisito' ei' hamoto' milaa' naadoti' nene lengele'mize gopo ikelizave lo gopo ga'ne nogiluve. <sup>4</sup> Ido' gopo ga'ne nogiluvoni' nene evene' mali'mo lengita ogo Izesu'nimu' lo-lengemeline' nene laza ezemu' lo-lingimunidi'mine lamo ato' gamazi lo-lengemaa' neihe ido' O'moso'mi Sikalahu' lingine gomu' dani' ne'mi emeni dameni've nene atoli'mine neivosa a'mine ve'mo dalizave lo lo-lengemeline' sikalahuli'mi emeni dameni've nene atoli'mine minaa' neihe ido' O'moso'mi gamazi lamine' gomu' gili dani' ne'mine minamo atoli'mine gamazi O'moso'mi gamazi lamine' ve lo lo-lengemaa' neihe ne'mine oga' neine' nene lingine a'minemu' gosele' lengebelamivo gamazi lamine' ve li gilingili igi gilaa' naani' nenako nemu' nene naza gopo ga'ne nogiluve. <sup>5</sup> Ne'mine ogo naza giluvoni' nene a'mine aposolo atoli'mine igi dizisa nizave lave engitoti' nene naza ngomo ne'minesi nene ma lemeti'

ogo nouve lo gelamuve. <sup>6</sup> Lamine' naza nene gamazi do lisihe' ogo laakumu' nene sukulu ma lamuvoni' nenako ne'mo engi' nene gamazi laato' nivile' i nilisaha mono' monovo gelaa' nene gele nge lo gele nouve. Naza ne'mino nouvoni' nene laza ne'mine mana'mine gono nodunidoti' nene soto' gehepeve do soto' ogo lengelebizekune.

<sup>7</sup> Naza nene lengi' do'mo dize-lengedelesa na'nise oko'ne do'mo lemo O'moso'mi gamazi lamine' lo-lingimuvoni' nene inele ogo haza gidini lo-lingimuvoni' neve nene goloso nite' dokuhe. <sup>8</sup> Ee, lengita neve gono dalongumu' nene noso' nite'ne nevo'mine nene lengitati' ma damo asi engita gono damo mino Izesu' evenele mulise atotati' nene gumine gidini dokuve. <sup>9</sup> Ne'mine noluvoni' nene naza linginesi minuvoni' gameneu' inite' ma vise' uvoni' inite' nene leze zuho Makedonia misubouti' ave nete nene mudise hizi ele' i-nidikevosa naza nene inite' vise' uvoni' ne'mi geni've nene lengita ve hamokisi ma gehe-damuvoni' nenako nemu' nene noluve. Ee, naza lengita evene' hamokisi ne'mine mana'mine geni nene gehe-lengedalove lo gizebo lekeseve ogo minuvoni' ve. Ne'mine ogo minuvoni' nenako mo ne'minevo' o do vo minelesuve. <sup>10</sup> Naza Kilisito' gamazi gihile nenita neive loloni' nene lingine gosoho' laane li ataize lamilisave. A'mine gamazi nene mo lamineto' nenako lingine mo gili nizave. Ido' a'mine'mine ogo gamazi mene ma loloni' nene mo lamineto' lolosuve. Ado' naza lengi' Akaia misubou' mono' gono daa' nouvoni' nene meni've nomine' haza

gidini daa' nouvongumu' nolize izo do naba ogo laa' nouvoni' aka'ne nene evene' hamolitesi mo keke' hizi tili-nidamilisave. A'mida gono daa' nouvodo' meni've nene inite' hamokisi mo keke' lengitati' ma damolosuve. <sup>11</sup> Ido' lengitati' inite' ma damolosuve noluvoni' nene naza lu'ne lengi' lengemamosa noluhe. O'ove. Neni' lu'ne lengeme nouvoni' nene O'moso'mo ningo gele neive.

<sup>12</sup> A'mine ve lelito' lisihe' o none li oko'ine di dizi laa' naavete laa' naani' gamazi nene gamazi gihile gelalive lo a'mine aka hize tilengedelongumu' nene naza idise do nouvoni' monovo'ne mene ha o'mo voovo' mino meni ne'mino inite' mo keke' ma damolosuve. <sup>13</sup> Nene noluvoni' nene nanitekumu' ve. A'mine ne'mine ve nene soza aposolo mini mono' gono daa' naani' nene evene' go'ine izisa di mini oko'ine losuvoloti' nene Kilisito' aposolo ne'mine lili' igi minaa' nave. <sup>14</sup> Ne'mine iga' naangumu' nene upuho' olonido' nomive. Nanitekumu' ve. Gamene ma asi've Satani ne'mosi nene do atoli'mine ogo angelo' lamine' labanalasi minine' ne'mine nene lolo' oga' neinako <sup>15</sup> nemu' nene eze gonolo' ve netesi nene di ato' igi monovo lisi-heli'mi gonolo' ve ne'mine lili' ilizani' nene inite' naba nomine' nenako ha lili' ilisave. A'mine ve nene ingine gono dani' votigilelo' nene gamene nabalo' lihime dalisave.

*Paulo' Aza Ei' Monovomu' Imine' Molo Longemosa Mulumo Geni Gehe'mo Vo Gono Daa' Ingumu' Nene Lo-ngimine' Gamazi*

<sup>16</sup> Naza gomu' lokuvoni' ma nene gohi ti' lo nolo-lingimuve: Evene' hamolitesi nenikumu'

nene negi ve li gilamilo. Ne'mine li gilamilizado' o neine'za lingine negi ve li gilili ma negi ningi mati ngimika' naani' ne'mine igi neni' nene ningi mati nimikavo nazasi nene monovo'nemu' ngomo ma do naba ogo lolove. <sup>17</sup> Ido' ne'mine gamazi loloni' nene Guvelesi ve'mi monovolo' e'metelovoba asi neni' monovo'nemu' gele ele'vole' ogo do naba ogo loloni' nene mo negi sunolo' e'metelesuha <sup>18</sup> evene' muki' oko'ine losuvoli'mi initekumu' nene di naba igi laa' naanako nazasi nene a'mine'mine ogo do naba ogo lolosuve. <sup>19</sup> Ee, lingine gamazi gele nge laa' nounive none li gili negi aleve nene ha longolize izi ningi mati ngimika' naani' nenako naza nene a'mine negi sunolo' e'meto ha do naba ogo lolosuve. <sup>20</sup> Ee, evene' malite di gelekele' gehepeve i-lingidaa' nahe ido' lengi' initetine nene bili gizaa' naahe ido' lingimimise' igi gotine izaa' naahe ido' ingine evene' naba lili' igi di gize'ninguko i-lingidaa' naahe ido' a'ine gavoso gotine vetingu' lingibilaha ne'mine mana'mine ani' nene lingine ha ningi mati ngimika' naave. <sup>21</sup> Inginge ne'mine inite' i-lingidaa' naani' ne'mino laza a'mine ne'mine inite' o-lengedelonido' nene amuzoteu' lisihe' amive. Ido' ne'mine o-lengedelonido' nene amuzo molamune' nenako ne'mo nene lovozo helelonido' o neihe. O'ove. Ne'mine olonido' nomive lo noluve. Ne neiha evene' malite ngehelele izamivo engi' monovo'inemu' di naba igi lilizani' nene nani monovo'inemu' lilizahe nazasi a'mine'mine ogo nehelele izamivo neni' monovo'nemukisi do naba ogo lolosuve. Mene

noluvoni' nene negi sunolo' e'metosa noluve.  
<sup>22</sup> Ingene Zuda ve leli' gulivete setohamo diti' igi Hebilaio' aleve none ido' Isilaele' aleve none ido' Abalahamu' a'vopilemo' zuhouti' nene none li laa' naha nazasi nene a'mine'mine ogo Hebilaio' ve ido' Isilaele' ve ido' Abalahamu' a'vopilemo' zuhouti' ve nene nouve. <sup>23</sup> Ido' ingine engikumumu' nene Kilisito' gonolo' ve none laa' nahe. Mene loloni' nene godo'ningu' gamazi nomiveti sunolo' e'meto ti' lo noluve: Neni' nene engi' ngivile' ogosa Kilisito' gonolo' ve gehepeve ne nouve lo noluve. Gono neve nene engi' ngivile' ogo amuzo goloso molosa duve. Ido' monokumu' ve lo nala' numungu' nene gamene vai' goloso engi' ngivile' ogosa vo mineka' mineka' uvoni' ve. Ido' monokumu' ve li nibilani' nene engi' ngivile' ivosa gamene vai' goloso nibilani' ve. Ido' gamene muki' nene helaa' akalo' vaa' uvoni' ve. <sup>24</sup> Gamene faef nene Zuda vete nala' gavosotunu' sogo' saga' izi nibilani' nene gamene teoti naeni (39) ne'mine nene nibilani' ve. <sup>25</sup> Ido' gamene setohamo nene Loma vete lobuno gavosodunu' nibilani' ve. Ido' gamene sitohamo ne'mine nene sipiu' nomonuvo sipi izo itine' ve. Ne'mine ogo guvo nosolo' nene ha nouvo holuka' hamokisi holise' hamokisi ogo vine' ve. <sup>26</sup> Ido' gamene muki' goloso nene aka hota hota vai' monuve. Ne'mino monuvongu' nene noso'mo nibiline' hakaa' neive. Ido' lasikolite nibilani' hakaa' neive. Ido' neni' zuho Zuda ve nete nibilani' hakaa' neive. Ido' heta ato' ve netesi nene nibilani' hakaa' neive. Ido' numuno ebe' nabau' nesi nene ganala votene' oga' nouve. Ido' ebe' hadivela nesi ido' guvo nosolo' sipiu'

monuvongu' nesi nene ganala votene' oga' nouve. Ido' Kilisito' evenele leze zuho none li soza laa' ave nete nene ganala di-nidilisa iga' naave. <sup>27</sup> Ido' naza nene nabuso'ne goloso ilivosa ato ato' gono muki' nene ele'vole' ogo duvoni' ve. Ne'mine ogo minuvongu' nene okise'nesi nene do guno ongosa'mo ido' noso' nitekumukisi nosomukisi nene ga'na helaa' ogo mino noso' nitekisi namo gamene vai' nene haza monaa' uvoni' ve. Ido' hepeku' nene oko'nelo' inite' nene hepeku' izo monaato' vo damivo hepe' novozo no'mo monaa' uvoni' ve. <sup>28</sup> Ido' neevo' nomive. Inite' gohi masi masi neine' lamuvoni' nesi ido' naza mono' mulise muki' gizebo o-ngedaa' geni nesi nene gamene gamene gehaa' nouve. <sup>29</sup> Ve mali'mo monoku' gilizevo ine' nene nenikisi a'mine'mi geni've nene gehesa'muvoba makato' gehe-lengedaa' nouvoni' ma neive. Ido' ve ma monokuti' limi ingani' nene naza engikumumu' oko'ne hulosa'muvoba mo hulaa' nouvoni' ma neive.

<sup>30</sup> Naza nenikumu' nene do naba ogo lolosa gelamuvoni'za nenikumu' do naba ogo lamo mineloni' aka nene ma nominako naza nene O'mosolo' lehete amo minelodo' nouvoba asi gilizevo o nouvoni' monovo'ne nemukovo' nene do naba ogo lolosuve. <sup>31</sup> Guvetesi ve Izesu' Kilisito' O'moso'vesi melehosi minive ado' opo'ni lo'mo vo nonivo osu' lamilive ne'mo me ve nene soza nomine' nemu' nene mo gele neive. <sup>32</sup> Damasiko numuno ebeku' nouvo a'mine mis-ubo nabau' guvelesi ve naba Aleta' a'mine numuno ebeto' gizebo hulo-dive kiate' ne'mo nene pilisive ngimiselavo ingine neni' dalisa

a'mine numuno ebeli'mi gatedo' nene gizebo igi nizavo <sup>33</sup> Izesu' evenelelite numuno ebeli'mi gesi ha'nau' viniduva' ma miningu' nene gosuvaha' goku' luhize nouvo nalato' nene huli heta i-nidikevo a'mine kiape' ne'mi anauti' nene golise vuvoni' ve.

## 12

*O'moso'mo Okulumoku' Monovo Lamine' Atoli'mine Nene Paulo'ni Elebizine' Nenako Ne'mo Ei' Nene Evene' Naba Gehesalive Lo Do Leme-delingumu' Nene Oko'nola Geni Mulumo Inite' Gehe-dine' Nemu' Line' Gamazi*

<sup>1</sup> Lelikumu' do naba oga' ne'mo nene evene' hize ele' o-ledesa'mine'za nenikumu' do naba ogo lamo mineloni' aka nene ma nominako nemu' nene neni' monovo'nemu' do naba ogo lolosuha a'mingu' nene Guvelesi ve'mo do soto' o-nedavo inite' ato ato' ve'nelo' o molangumukisi ido' atoli'mine inite' nelebizingumukisi nene lolengemelesuve. <sup>2</sup> Naza Kilisito' evenele mamu' gele nouve (neni' ve lo lo soto' oloni' nene edamil-ihe loo ve malo' lo nomuluvoni' gilivo noluve). A'mine ve aza nene kilisimasi fotini (14) ogo vine' ne olihe api' olosa idoti' nene okulumo' nama minaa' ani' nene hulo ho' ike'ni sonohi' minaa' ani' nesi nene hulosa O'moso'mo ei' minaa' idaa nene ele'mizo dizine' ve. A'mine ve nene oko'no've hulosa dizo vihe ido' oko'no'vesi dizihe nemu' nene gelamuve. Asi O'moso'movo' nene gele neive.

<sup>3-4</sup> A'mine ve nene O'moso'mo Okulumo' ebe' lamine' Paladisiu' nene ele'mizo dizavo a'mida nene gamazi lamine' evene' laza lolonido' lisihe' amune' ido' lo soto' amaato' ve li li hukani'

gamazi galau' giline' nene gele nouha oko'no've hulosa dizo vihe ido' oko'no'vesi dizihe nemu' nene naza ma gelamuve. Asi O'moso'movo' nene gele neive. <sup>5</sup> Ee, naza a'ne'mine vemu' do naba ogo ha lolosuha nenikumu' nene do naba ogo ma lamolosuha asi gilizevo o nouvoni' monovo'ne nemukovo' nene do naba ogo lolosuve. <sup>6</sup> Ido' lamine' naza nenikumu' do naba ogo ma lolove lo giluvodiniko mo gamazi gihile laminekovo' luvodinako neni' nene negi minamuvodine. Ne'mine minamuvodine'za evene' malite nenikumu' gililizani' nene angise'ine nene neni' monovo'nemu' ningi gilani' votigile ivile' ogo dizalive losa ne'mine olosa gelamuve. <sup>7</sup> Ido' Guvelesi ve'mo ato atoli'mine inite' gehepeve nelebizine' nemu' neni' nene oko'no do dizalive loo lokosolo' medeluvoni' gilivosa oko'neu' mene mulumo alumo do soto' o-nedeka' o-nedeka' ogo mineline' inite' nene ma nimine' ve. Ee, neni' nene oko'ne do dizeloni' aka hize tile-nedo a'mine inite' nene ogo lovo o nemelive loo Guvelesi ve'mo laavosa Satani'mo imiselavo a'mine inite' nene ogo lovo o nemeka' nemeka' neive. <sup>8</sup> A'mine ogo lovo o nemeka' nemeka' ine' inite' nene Guvelesi ve'mo do hulilive lo eita agae lo gamene setohamo luve. <sup>9</sup> Lokuvo Guvelesi ve'mo ti' lo lo nimine' ve: Evene' gilizevo minavela nene neni' amuzo'ne ngelebizeloni' aka gihile lamine' nene soto' o-nedaa' neine' nenako nemu' nene gei' nasahili' o-gedaa' nouvoni' ne'mo geita geni soto' o neine' nene ha gehe do dizeline' votigilelo' nesi nene ha vo do neive lo line' ve. Ne'mino neine' nenako nemu' nene inite' mamu' do naba ogo lamo asi Kilisito'



amuzo've nenita soto' ogo minelingumu' ve lo neni' do gilizevo o-nedaa' neine' initeukumukovo' nene nolize izo do naba ogo lolosuve lo gele nouve. <sup>10</sup> Nemu' nene naza Kilisito'nimu' nene gilizevo ogo minuvongu' nehe ido' evene' neni' divi ledivi' i-nidangu' nehe ido' lihitehe akalo' mine molo minuvongu' nehe ido' evene' malite goboni mala' mala' mili-nidangu' nehe ido' inite' mali'mo aka'ne gize gehepeve o-nidihe ne'mine ingu' nene mulu'neu' goloso gelamo ha lamine' gelo minaa' nouve. Nene nanitekumu' ve. Naza gilizevo o nouvoni' gameneu' neve nene Kilisitoda lehete o minuvodi'mo nene mo amuzo molo minaa' nouve.

*Lengitati' Noso' Nite' Namuvoni' Ne'mo Nene Goloso Amive. Ido' Gotine Izamuve Lo Engita Gohi Vilingumu' Nene Engita Monovo Goloso Ha Minelihe Lo Gopo Gala Gilingumu' Lo-ngimine' Gamazi*

<sup>11</sup> Naza negi monovolo' e'meto gamazi mene lo minuvoni' nene lengi' lengemenitine'mo ivosa nene luve. Ee, lingine di naba i-nidilizado' o neine' nenako di naba ma i-nidadiniko naza nene neni' do naba olodo' ma minamuvodi- inako neeve nene mo lengi' lengemenitine'mo ivosa nene do naba ogo luve. Ido' lingine di naba i-nidilizado' o neive noluvoni' nene naza haza nitekisi noluha a'mine aposolo dizi nizave laveloti' nene ngomosi' ma lemo minamuvoni' nenako nemu' nene noluve. <sup>12</sup> Ee, lengita minuvoni' gamenelo' nene geni gehe'mo ogo minuvongumu' nene gele hulo ato atoli'mine suno vodine vine' inite' amuzo nite' nene do

soto' ogo aposololiti suno gehepeve nenita minine' nene lengelebizuvoni' ve. <sup>13</sup> Ido' lingine gilavo naza Izesu' evenele mulise linge muki' o-ngedaa' uvoni' inite' ne'mine nene lengi' ma o-lengedamuvo engi' nene lingivile' igi nizani' nehe. O'ove. Engi' o-ngiduvoni' inite' muki' nene lengikisi o-lengedosa inite' hamokovo' nene ma o-lengedamuvoni' ve. A'mine nene ado' lengitati' noso' nitekisi ido' initekisi nevo'mine ma damo minuvodi'mo nene geni ma gehe-lengedamuvoni' ma neive. Ne'mine amuvoni' nenako neeve nene lengita monovo goloso o-lingiduvoni' neivosa a'minemu' nene naza agae loo lihime'ne mene huli-nidilo lolodo' neihe. Ne'mine ma lolodo' nomive. <sup>14</sup> Gililo. Naza idise do va'va' ogo mino lengita gohi alosa novoni' nene mo gamene sitohamo ivosa nene nouve. Ido' aloni' nene a'mine'mine ogo geni ma gehe-lengedamolosuve. Naza gele novoni' inite' nene lengi' mili nizani' initetine nemu' nene gele nouvoba asi lengikumumu' neeve nene gele nouve. Neve nene nanitekumu' ve. Izipaha'ine nete ize'ningine me'ningine inite' salani mili-ngidilizado' nene nizavoba asi ize'ninge me'ninge nete nene izipaha'ine inite' salani mili-ngidilizado' nene nizave. <sup>15</sup> Ido' naza a'mine'mine ogo lengikumumu' nene nolize izo nenita minine' inite' nene hulosa neni' minevo' alevo'nesi nene hulo labuluvo gehepeve olosuve. Ne'mino naza lu'ne lengeme novoni' votigile do naba gidini okuvo ne'mo nene lingine lutine nimani' votigile nene di ngomo ilizani' nene lisihe' o neihe. <sup>16</sup> Ido' evene' linge ma

nenikumu' nene ti' li nilave: Ei' nene geni ma gehe-lengedamo noline'za ei' nene tilikilo' ve mino gotine izo dani' noloseive. <sup>17</sup> Ee, evene' lengita ngimiselivela laavo ingine lengita igi initetine gotine izi diisa di vi imi nilisaave nilani' nene mo lamineto' neni' ngimiseluve hamoli'mosi ma ne'mine ido' nilahe. Mo o'ove. <sup>18</sup> Naza Tito'ni do ote-dekuvo lengita vine' nene leze zuho masi ezese maka' imiselekuvo vasine' ve. Ne'mini vasingu' Tito' nene initetine ma tilikimi o-lengedo do nolihe. O'ove. Azasi laza nene lemeni dameni hamoli'minesi mino hamo' monovolo' e'meto hamo' gono nodune' nenako ngelo ne'mine amoloseive.

<sup>19</sup> Gamazi ha'na gizuningu' mene lingine gilavo lengi' vetido' leli' monovote nene lamine' ilive losa a'mine monovote nene hize ele' ogo gizune' nehe. O'ove. Laza Kilisitoda gi'mizo mino O'moso'mi velelo' neve nene a'mine gamazi nene gizune. Ido' gizune' gamazi muki' nene lu'ne lengeme nouvoni' aleve lengi' nene monoku' do amuzo molo-lengedelesa nene gizune. <sup>20</sup> Ido' ne'mine o-lengedelesa gizuvoni' nene naza ogo lengi' ningeloni' nene lingine ne'mini minilisaaze lo giluvodi'mine igi minamavo ningelohe ido' lingine ningikevo neni' nene ne'mino mi-naalive li giladi'mine ogo minelohe lo gopo ga'ne nogelosa nene gizuve. Ee, naza lengita ogo lingine lovo lolize iga' ido' ge lukehe nebele ne lukehe gebele laa' ido' lingizebolo' molaa' ido' mine eza ema igi hizi ho'laa' ido' divi ledi-vika laa' ido' mehe'nida gamazi laa' ido' evene' naba gehesaa' ido' di gopo' napa iga' monovo

ne'mine nene igi nizavo ogo ningelohe lo gopo ga'ne nogiluve. <sup>21</sup> Ee, gohi naza lengita ogo hetelekuvo O'moso'ne ne'mo lengi' vetido' lengi' monovotinemu' nene do leme-nedelihe lo gelo lengikuti' evene' linge mukilite monovo goloso gomu' dani' ado' lute do goloso oga' monovosi vene' vemoho' alu gipe gopo ingaa' monovosi ido' ne'mine mana'mine monovo goloso ngovozo hilami gopo iga' monovosi nene igi mili minaa' angumu' nene ingine lu'ine di velepe' izami minikevo naza engikumu' nene agae lo ive ga'ne dizelido' o minelihe lo gelo gopo ga'ne nogiluve.

## 13

*Lengita Ogo Gonitine Gelo Isetine Izamo Lihime Dave Nene Lihime Lengemelone' Nenaze. Monovotine Di Lisihe' Ilizave Lo Lo-ngedosa Geke' Lo-ngedo Paulo' Gamazi've Gize Osu' Line' Gamazi*

<sup>1</sup> Lengita alosa nouvoni' meve nene gamene sitohamo ivosa alosuuve. Ido' ogo gonitine geletoni' nene mono' godolou' ti' li gizi nizado' nene do molosa gele-lengedelesuve: Gamazi gono nidavo lihime dave'mi monovo li soto' ilizave nene sitape sitohamope ne'minete mini hamo' gamazivo' likevosavo' nene lamineto' likeve li gili ele'vole' ilisave. <sup>2</sup> Nemu' nene gomu' lengikisi gamene sita' vo minuvoni' gamenela nene lihime gomu' dani' alevesi ido' evene' linge mukikisi lo-lingimuvoni' gamazi nene idise lengikisi minamuvongu' nene gohi ti' lo hungo' molo nolo-lingimuve: Gohi aloni' nene isetine mo keke' izamolosuve. <sup>3</sup> Ne'mine oloni' nene Kilisito' nene nenita mine molo neivosa gamazi noluve

noluvoni' nene mo lamineto' noluvoni' monovo lengelebizelongumu' nene lingine nilani' ne-nako nemu' naza ne'mi monovo do soto' ogo lengelebizeloni' nene isetine izamolosuve. Ee, Kilisito' lengito' gono daa' neine' nene gilizevo ogo daa' neivoba asi lengi' vovotingu' nene amuzo molo gono do minaa' neine' ma neive. <sup>4</sup> Lamineto' aza nene gilizevo ne'mine lolo' ogo neido' nene lohoto' zalo' bilani'za O'moso'mi amuzo eita gono do minine' ne'mo nene gohi vele gizo minevo' dovo' ogo neive. Ee, laza nene eikisi a'mine'mine ogo gilizevo ogo none'za O'moso'mi amuzo lelita gono ha do neine' ne'mo nene ezesi vete gizo minevo' dovo' ogo mino lengikumu' ve losa nene gono dalosune.

<sup>5</sup> Lamineto' lingine nene mo mono' lulou' nene nizahē nizamahe ne'mi monovo di soto' ilisa langisetine monovotine nene emengu' mili ize' mili di ningilo. Lengi' lutingu' lutingu' Kilisito' mine molo neingumu' nene langisetine nene gili guni amahe. Ee, lingine nene O'moso'mo ninge mate-lengedelido' minamavo ma nene mo lamineto' Kilisito' nene lengi' lutingu' mine molo neive. <sup>6</sup> Ido' ne'mine o neinako lingine leli' ningavoo O'moso'mo ninge mate-ledamivo ha gono dalonido' minelesune losa nogiluve. <sup>7</sup> Laza lengikumu' nene monovo goloso hamokisi nene ma damilizahoo lo O'mosola laa' noune. Ido' ne'mine lo O'mosola laa' noune' nene lingine monovo goloso damii minikevo O'moso'mo leli' nene ningaavo gono dalonido' lisihe' o none' nene soto' ogo minelingumu' ve losa nene ma losa'mune. Asi leli' nene O'moso'mo ninge mate-

ledavoo gono dalonido' lisihe' amune' gele no-line' nevosi nene alamo lingine monovo lisihe' laminekovo' igi mili minilizangumu' ve losa nene laa' noune. <sup>8</sup> Ido' ne'mine noluvoni' nene laza inite' ma oloningu' nene gamazi gihile belo do'mo leme-deline' inite' nene mo keke' ngelo ma amolosune. Asi gamazi gihile hize ele' iline' initekovo' nene olosuunako nemu' nene noluve. <sup>9</sup> Ee, lingine monoku' amuzo mili minaa' ani' ne'mo nene laza amuzote do soto' olone' akate nomivosa gilizevo ogo minaa' olone' gamene muki' nene lolize izo minaa' noune. Ido' ma neemukisi nene O'mosola laa' noune: Ado' lengi' nene mudise di lisihe' igi minilizave losa nene laa' noune. <sup>10</sup> Ido' naza lengita olihe amo mino ne'mine gamazi mene nogize-lingiduvoni' nene lengita alongu' nene Guvelesi ve'mo neme neine' amuzo nene do soto' ogo lingine dovo gizevo' ogo lengelemalove lo gele minosa nene nogize-lingiduve. A'mine amuzo nimine' nene monoku' do'mo leme-lengedelongumu' ve losa nevoba asi do'mo dize-lengedelongumu' ve losa nene nimine' ve.

<sup>11</sup> Neze zuhokizo, gamazi gize osu' lolosa lumola mene ti' lo nolo-lingiduve: Longolize izisa minilo. Ido' monoku' nene di lisihe' i'mi dizi minilo. Naza gamazi luvoni' mene gili diisa minilo. Ido' lutine gatine've nene hamoli'minevo' minivosavo' nene minilo. Ido' lengiku' nene hongu li laminiivo' minilo. Ne'mine ikevo lulo lemo do hongu lo-ledaa' neine' O'moso ne'mo nene lengikisi mine molo minelive. <sup>12</sup> Lingine nene O'moso'mi evenelelite ilizado' o minine' monovolo' nene igi ge nabuti'

ize ne gabuti' ize li minaa' ilo. Ido' O'moso'mi evenele muki' nete nene longopo'ni nilave.

<sup>13-14</sup> Guvesi ve Izesu' Kilisito' nasahili've nene lengikisi mine molo neivo O'moso'mi lulo nesi lengita neivo ido' O'moso'mi Sikalahuli'mo nene lengikisi bizo minaavo minilizahoo lo noluve.

Modave.

**MONO' GODOLO GOSOHO'**  
**The New Testament in the Dano (Upper Asaro)**  
**language of Papua New Guinea**  
**Nupela Testamen long tokples Dano (Upper Asaro)**  
**long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 21 Feb 2024 from source files dated 31 Aug 2023

76c78bc1-63e6-5f61-a363-169051cfe72e